

堂上

卷三

卷四

總管內務府現行則例



總管內務府現行則例

堂上二冊 定價壹圓伍角

版權所有

民國二十六年一月出版

二十元

欽定總管內務府現行則例

堂上卷三

接送聖駕事宜

嘉慶十四年三月軍機大臣面奉諭旨嗣後由檀柘至靜宜園所有接駕之王公文武大臣等不必在香界寺地方接駕著於健銳營教場之南二三里外接駕由香山回至圓明園不必在藻園門站班次日亦無庸全遞膳牌並於恭謁東西二陵回鑾次日亦不必遞全牌其木蘭秋獮回京及時日久遠者仍照舊遞全膳牌著永遠遵照欽此 十九年八月奉上諭御史魯垂紳奏請申明典禮以崇體制一摺向例每逢祭祀大典朕出入禁城各衙門派有官員在禁門外迎送近日迎送之員甚屬寥寥殊非敬慎之道著通諭各衙門嗣後該堂官將迎送官員酌定名數派出後先期造冊咨都察院屆時由齊班御史將迎送各員職名按冊查收覈對如有曠誤該御史指名參處欽此 道光十九年二月奉旨嗣後朕恭謁兩陵回至南苑王公大臣等於燕郊黃新莊接駕後毋庸復至鎮國寺小紅門接駕欽此 是月軍機大臣面奉諭旨嗣後朕恭謁兩陵啓鑾前一日回鑾後一日俱著毋庸呈遞全牌欽此 二十一年二月奉上諭嗣後朕祇謁東陵西陵留京王大臣

及步軍統領仍照向例於燕郊黃新莊接駕其王公大臣等除應行謝恩各員外餘均無庸前往即自本年爲始欽此 咸豐二年四月奉上諭嗣後王公大臣著仍照舊例遇朕恭謁東陵回京時在燕郊接駕恭謁西陵回京時在黃新莊接駕欽此

### 慶賀事宜

嘉慶十三年四月奉上諭一日萬幾豈可稍怠本月二十二二十三兩日內閣均未進呈刑名本章實屬非是雖因二十一日朕初得長孫爲國家茂衍蕃釐但究於定制未協又涉怠於勤政况此次初得長孫宮中並未設席演劇諸事照常而諸臣何必如此迎合耶向來凡遇慶喜令辰將立決奏章暫緩呈進原有一定章程並無因誕育皇孫連朝不進刑名本章之例設從前原議章程內載有此條朕亦必早爲刪除試思政務殷繁豈容稍有曠誤若將立決奏章暫爲緩進一日猶屬可行至於尋常刑名事件卽降旨後尙須俟次年秋審辦理且屆時亦有情實緩決之分此時何所避忌前日未見奏遞刑名本章已覺不愜乃待至昨日猶未見呈進似此積壓頻仍勢必漸形叢脞豈朕勅幾勤政之意乎大學士等均著傳旨申飭嗣後不必如此揣摩朕非好言祥瑞之主唯知勤政愛民耳再

前此誕育四阿哥時在廷諸王公大臣均各呈遞如意四阿哥係朕登極後皇后誕生之子臣工等抒忱展慶理所當然卽前日諸王公大臣等以皇長孫誕育亦皆呈遞如意朕因初慶抱孫特行賞收並於兩次俱回賞如意用示錫祉聯情至此後慶育蕃昌正未有艾將來凡遇誕生皇子皇孫諸王公大臣等均不准呈遞如意違者治罪將此旨著內閣存記併諭諸王公大臣等知之欽此 五月奉上諭因皇長孫誕育在廷王大臣呈遞如意特降旨嗣後凡遇誕生皇子皇孫俱無庸呈遞近來外省將軍督撫以及學政藩臬兩司總兵等因育皇長孫俱紛紛具摺陳賀未免漫無區別將軍督撫分位與內廷卿貳相埒抒忱展慶體制攸宜若藩臬總兵及學政中之品秩較小者可無庸呈遞賀摺從前四阿哥係登極後皇帝誕生之子此次皇長孫又係朕初慶抱孫內外王大臣相率奏賀尙屬理所當然至嗣後慶育蕃昌正未有艾每遇誕生皇子皇孫不特外省將軍督撫不准陳賀卽內廷王公大臣亦不必申賀也將此通諭知之欽此 六月奉上諭松筠叩賀朕得皇長孫摺內惟稱叩賀聖主大喜所奏甚是朕得皇長孫諸臣叩賀摺內祇宜稱叩喜拜賀不宜錄入許多吉祥言詞松筠此摺甚屬得體伊之見識較與興奎和寧輩實爲遠

勝昨興奎和寧愛星阿來靈等叩賀朕得皇長孫摺內俱稱不勝踴躍欣忭並載入許多煩瑣吉言甚屬無謂不曉事體之至除興奎和寧等業經申飭外愛星阿來靈等亦著俱行申飭嗣後如遇朕得皇子皇孫內外諸王大臣不必再行具摺叩賀將此通諭知之欽此十一月軍機大臣面奉諭旨嗣後遇有一切喜慶筵宴及朝會事宜均不得用齊集字樣欽此十九年十月軍機大臣面奉諭旨向來遇有慶節呈遞如意並未有一定體制嗣後內廷臣工不論品級外廷大學士尙書左都御史都統宗室入八分公以上及外省來京之將軍督撫提督鹽政關差織造有呈遞如意者准奏事處接收其文職侍郎以下武職副都統以下外官藩臬總兵俱不准呈遞如意休致官員惟大學士准遞餘俱不准呈遞奏事處亦不准接收欽此二十四年正月奉上諭國家每逢慶典及年節令辰於太和殿保和殿正大光明殿紫光閣山高水長舉行筵宴皆列聖定制留貽事關典禮執事臣工理應整齊嚴肅以重朝儀乃近日管宴王大臣及護軍統領等皆不先事詳查竟不演習一任參差錯誤漫無約束實屬怠玩因循即如本年元旦朕御太和殿筵宴親見殿內所列桌張空設者竟有五六十處成何體制豈不慮外國使臣所竊笑乎此非承

辦衙門豫備過多即係與宴人員有應入宴而未到者且是日朕甫經起座即聞殿內人聲嘈雜大乖體制著承辦各衙門再將筵宴事宜妥議章程具奏桌張務與人數相符嗣後如有空設桌張管宴大臣即行查明如係多設罰令該衙門著賠仍將承辦之員參處如係與宴人員無故不到即將不到之員指名參奏管宴大臣不行查參經朕看出惟管宴大臣是問執事官員夫役著該管護軍統領嚴立門禁先期由各衙門造送名冊屆期按名放入昇送桌張者安設畢先令退出門外俟禮成朕回宮後再令該衙門率領人役按名點進進殿撤桌如有閑雜之人私行混入者查係何門放入將該班官兵同本人一併拏交刑部從重治罪自此次正大光明殿筵宴爲始即著稽察嚴整如有仍前疎略者定行懲處不貸欽此 十二月軍機大臣面奉諭旨明年元旦內廷行走者不論品級俱准遞如意其外廷文武大員及御前乾清門行走各員惟一品大員准遞外省年班來京將軍副都統等亦祇准一品大員呈遞其鹽政關差不論品級俱准呈遞所有應遞如意各員仍照常於正月初一日呈遞欽此 二十五年正月奉上諭元旦令節萬壽慶辰王大臣等呈遞如意藉伸頌祝從前俱有等差近來呈遞者太多不可不示以限制自本年



萬壽暨明歲元旦爲始親王郡王貝勒無論內廷外廷行走俱准呈遞貝子公惟內廷行走者准其呈遞軍機大臣南書房翰林內務府大臣無論品級俱准呈遞尙書房行走各員俱不准呈遞大學士尙書領侍衛內大臣俱准呈遞都統在內廷行走者方准呈遞侍郎副都統俱不准呈遞御前侍衛一品者准其呈遞乾清門侍衛概不准呈遞年班來京文武大員亦惟一品者方准呈遞著通行曉諭其各恪遵毋違欽此 道光三年十月總管內務府大臣禧恩面奉諭旨嗣後恭遇皇太后萬壽聖節內務府大臣等不必呈進宴桌著照舊遞如意進喫食三九盒欽此 十五年十月奉旨本月初十日皇太后六旬萬壽內廷行走親郡王御前大臣軍機大臣內務府大臣俱准呈遞如意欽此 十六年八月奉旨嗣後萬壽慶節若遇兩皇子王公等著在正大光明殿檐下行禮文三品武二品以上官在出入賢良門內外檐下左右行禮文四品武三品以下各官著在大宮門內外檐下左右行禮其丹陛樂著移於正大光明殿東西廂檐下餘依議欽此 二十八年十一月和碩怡親王載垣面奉諭旨自此次爲始皇太后萬壽聖節如不陞殿受賀綺春園宮門外陳設儀駕著鑾儀衛官員率領校尉豫備及元旦令節慈寧宮皇太后若不陞殿

受賀長信門外陳設儀駕亦著鑾儀衛官員率領校尉豫備如恭遇皇太后萬壽聖節及元旦令節若陞殿受賀所有陳設儀駕仍著太監豫備以後永遠爲例欽此

### 奏請貶封

嘉慶元年二月奉上諭刑部衙門因司員等懇請貶封據情代奏一摺向來遇有覃恩大小官員原准貶封但所請貶封之人如係伯叔兄長外祖等尊屬身受撫育恩慈例得推恩者自應准給封典若係疎遠戚屬姻親亦輒轉懇請貶封與例不合者豈可漫無限制其應准應駁部中自可循照定例分別覈辦又何必由各衙門紛紛自行瀆奏耶嗣後內外大小官員懇請貶封者俱著彙報吏部查覈所請情節分別准駁彙題以省繁瀆而昭限制其有情節委曲不同者該部聲明另奏若有私弊許科道封奏所有本日刑部衙門奏請貶封一摺即照此辦理欽此

### 謝恩事宜

乾隆五十七年十一月奉旨昨恭閱祝版回宮見有謝恩人員在景運門碰頭甚屬非是嗣後郊祀齋戒期內所有應行謝恩之員俱不准叩頭欽此 嘉慶五年七月奉上諭嗣

後滿漢文武大臣中有派令兼部旗事務僅在一月以內並非長久署理者俱不必紛紛專摺謝恩欽此 十一年十一月奉旨嗣後內務府護軍統領所有應行謝恩之事著內

務府大臣據情代奏並著內務府大臣帶領碰頭以符體制欽此 十二年八月奉上諭

嗣後遇有簡放各員不必前赴行在謝恩俟回鑾時遠迎兩三站謝恩接駕可也欽此

十三年八月奉上諭昨新授鴻臚寺卿永祚前來熱河謝恩召對詢知伊問過留京王大臣令其前來等語上年朕駐蹕熱河遇有簡放在京各員均降旨令其不必前赴行在俟回鑾時遠迎一二站謝恩自應欽奉遵行何必每歲特行申諭留京王大臣於此等尋常事件既涉拘泥又不肯酌定主見著傳旨申飭嗣後行在簡放各員除奉特旨令其前來外餘俱仍遵前旨行欽此 九月奉旨昨因賞給內廷行走王大臣等哈密瓜均在朕前

面叩謝恩朕賞給王大臣物件固宜當面叩謝亦應酌量賞賚物件輕重耳哈密瓜僅一食物向年賞給俱不謝恩今因賞給皆面叩謝恩殊覺過尙虛文好事是欲意存敬重適

滋繁冗也嗣後凡遇賞給尋常食物均著不必叩謝欽此 十九年九月奉旨嗣後鹽政

織造鈔關如司員年滿來京俱照依新疆等處侍衛換班之例毋庸遞請安摺所有應奏

事件著總管內務府大臣代奏欽此 是月奉旨密哩之子都克錦因放前鋒校密哩具摺謝恩前鋒校乃係兵丁數內以虛六品頂戴尙食錢糧非與食俸官員可比今密哩特具摺謝恩殊屬不合除將密哩申飭外以後大臣子弟如食俸者應具摺謝恩其護軍及食錢糧等官俱不必謝恩欽此 道光十九年十月奉旨敬敏奏貝子奕緒接班遲誤據實奏明請旨此次奕緒輪應進班因赴園謝恩以致到班遲誤與無故曠誤者有間著加恩免其議處嗣後該班王大臣等輪應進班之日遇有應行赴園謝恩事件著於出班之次日謝恩以昭畫一欽此 二十八年三月總管內務府大臣文慶柏蔭面奉諭旨嗣後內務府及三院司員遇有簡放鹽政織造鈔關熱河總管人員著於謝恩請訓摺內將新放何處官銜註寫明白欽此 二十九年十一月總管內務府大臣文慶阿靈阿面奉諭旨嗣後鹽政織造熱河總管及各關監督等呈遞謝恩請安奏事等摺暨來京應遞安摺均著書寫官銜欽此 咸豐元年二月奉旨毓書扎拉芬各因賞給廕生謝恩一摺廕生理應由吏部帶領引見賞給職任後方可繕摺謝恩今毓書扎拉芬於接到部文即具摺謝恩甚屬繁瑣嗣後凡有謝恩摺奏不可如此重瀆欽此

摺奏書稱

乾隆三十年十一月奉上諭內外各衙門題奏事件遇有地名字面理應遵照全寫乃向來章疏祇圖省便每將地名節稱一字其謬不可枚舉如熱河之但稱爲熱多倫諾爾之但稱爲諾則其尤甚者此皆幕友吏胥相沿行文陋習行之奏牘殊非敬謹入告之體昨戶部進蠲免海州沐陽積欠本內輒照原題寫作海屬字樣內閣亦即照依票籤經朕指示改正今楊應琚奏開渠增墾一摺稱巴里坤爲坤城亦令增改發鈔矣前因各該衙門有稱滿漢蒙古者曾經降旨訓飭此等字面皆可類推何竟不知舉一以例三耶嗣後凡有地名字面一概全寫不得競趨簡易致乖體制著宣諭內外各衙門知之欽此 嘉慶八年二月奉上諭明亮奏烏魯木齊所屬地方應辦刑名錢糧漢字事件較多請仍令原任山西潞安府經歷陳聖域辦理一摺著照所請行惟摺內稱陳聖域於嘉慶六年五月內到烏將烏魯木齊截去下三字於文義殊屬不合向來各省地名如用漢文書寫已不應僅用一字若於清文內率行裁截尤不成話嗣後內外各衙門遇有陳奏事件於應載地名惟當全行書寫不得任意截去欽此 九年十一月奉旨兵部奏議處保送不慎之

都統佛爾卿額等擬以罰俸抵銷著依議行惟摺內於應寫滿洲蒙古二字之處輒省去一字寫爲滿蒙文滿蒙話屢見數處殊屬不合所有未經看出之兵部堂官著交部察議承辦司員著交部議處嗣後大小各衙門於呈進章疏務當加意檢點無得率用省文致礙文義欽此 十七年十一月奉上諭本日內務府議奏長蘆鹽商義和泰懇借運本銀兩一摺已依議行矣摺內引照乾隆五十一年商人王世榮請借帑銀原案叙稱奉高宗純皇帝特旨准借措詞殊未審慎各部院章奏關係重大典禮書寫廟號尊諡進呈時朕必敬奉展觀倍加虔肅若尋常事件輒引用書寫轉致輻輳嗣後各衙門具奏尋常事件凡引用乾隆年間以前舊案但載明年分將奉旨字樣三擡書寫卽足以表示敬恭遇有典禮奏章必應恭引廟號尊諡者方准敬謹書寫以昭慎重欽此 十八年六月奉上諭昨因宗人府奏移居宗室戶口單內開寫妻室氏族有張氏白氏李氏等姓恐係與漢人聯姻令宗人府查奏茲據查明前次單開漢姓有係漢軍人者有以章佳氏訛寫張氏者李佳氏訛寫李氏者博爾濟吉特氏訛寫白氏者其中並無與漢人聯姻之人凡分姓受氏滿漢一理滿洲之瓜爾佳氏章佳氏皆係相沿清語亦如漢姓張李並無文義可尋豈

容刪減覆字以訛傳訛寢忘本始嗣後書寫氏族不但宗室妻室宜照本姓書寫其八旗滿洲蒙古人等俱各照氏族書寫不許改寫漢姓以正根本以杜訛僞將此通諭八旗並各省駐防知之欽此 二十年六月奉上諭昨日朕披閱內務府進呈則例恭載乾隆三十年皇考高宗純皇帝諭旨內外各衙門題奏事件遇有地名字面理應遵照全寫乃向來章疏祇圖省便每將地名節稱一字其謬不可枚舉如熱河之但稱爲熱多倫諾爾之但稱爲諾則其尤甚者嗣後凡有地名字面一概全寫不得競趨簡易致乖體制欽此嗣於嘉慶八年明亮奏烏魯木齊地方事件將下三字截去祇稱其地爲烏又經朕降旨訓飭內外各衙門自應一體凜遵乃本日劉鐸之等奏懇留投効委員摺內將順天府節稱爲留順字樣實屬簡率著通諭各衙門凡有陳奏事件於應載地名字面務遵照定例全行書寫不得任聽幕胥率用省文致乖敬謹入告之體欽此 二十五年七月太常寺奏准關帝廟文昌廟均改雙臺書寫 道光九年五月奉上諭內外各衙門題奏事件遇有地名字面理應遵照全寫如熱河之但稱爲熱多倫諾爾之但稱爲諾烏魯木齊祇稱爲烏順天府節稱爲順從前乾隆嘉慶年間歷經聖諭訓飭並載入則例凡遇地名字面不

得率用省文各該衙門自宜永遠恪遵本日據扎隆阿等奏請將餘糧酌改折色摺內葉爾羌書寫葉城並有阿烏喀三城字樣實屬簡率不成文理著再行通諭各衙門嗣後於應載地名字面務遵定例全行書寫斷不可任聽幕友胥吏祇圖省便致於體制有乖欽此 十六年三月奉上諭嗣後凡遇應書昌陵恕妃衙門著書作和裕皇貴妃園寢龍泉峪平貴人園寢著書作龍泉峪妃園寢並著禮部通行各該處一體遵行欽此 是月奉上諭朕本日恭閱乾隆三十七年皇祖高宗純皇帝實錄內載內外各衙門題奏咨行事件凡遇滿洲蒙古人地名應譯對漢字者往往任意書寫並不合清文蒙古本音因而舛誤鄙俚之字不一而足於體制殊爲未協著交軍機大臣依國書十二字頭酌定對音兼寫清漢字樣刊成簡明篇目頒行中外大小衙門俾各遵守欽此聖訓煌煌允宜永遠恪遵近來內外各衙門疏章案牘於滿洲蒙古人地名清漢對音之字間有參差未能畫一自係奉行日久講習漸疎以致臨文書寫多有譌誤著武英殿即將清漢對音字式一書再行刷印頒發中外大小衙門嗣後遇有滿洲蒙古人地名對音之字一體凜遵定式查照譯寫不得仍前舛誤以歸畫一而昭法守欽此 二十四年五月奉旨以後書寫固倫



和碩公主等稱著將固倫和碩字樣與公主二字相連書寫不得以固倫等字樣寫在封號之前欽此

### 摺奏行款

乾隆二十五年六月奉旨前因倭敏將滿洲人名照漢人名單寫具奏朕即降旨宣示滿洲人名理應聯寫不可單寫茲閱正黃旗滿洲爲署那丹珠之佐領進呈家譜內將恩奎昌安玉林之名因何仍舊單寫豈不可聯寫著該都統等明白廻奏將此覆加通行曉諭八旗各省嗣後滿洲人名均著聯寫再有單寫者治罪至若宗室內單寫名者固多然近派宗室尙可單寫遠派宗室即不得如此單寫此係辨尊卑之道除通行曉諭外將那丹珠之佐領著另選人員帶領引見欽此 五十九年九月欽奉諭旨所有各部院衙門陳奏事件及內閣呈進本章嗣後俱毋庸夾看條一律於應夾看條處飛黏黃籤等因欽此

嘉慶五年四月奉上諭近來各省陳奏事件凡本章摺奏內恭載乾隆年間皇考諭旨與嘉慶年間所降諭旨一律擡寫殊非敬謹之道所有各省呈遞本章經內閣票擬其擡寫不合之處俱簽出請旨飭行而各省遞到奏摺擡寫每有參差未經通飭嗣後在京各

衙門及各直省文武大臣遇有陳奏事件恭載乾隆年間皇考諭旨首行俱用三擡嘉慶年間朕節次所降諭旨首行俱用雙擡均歸一體凜遵不得仍前疎忽將此通諭知之欽此 八年十月軍機大臣面奉諭旨現屆萬壽節內所有內外各衙門呈遞奏章或用黃摺或竟用白摺殊覺參差嗣後每屆萬壽及年節內應穿綵服之期內外文武各衙門如遇奏事則用黃面白摺其慶祝及謝恩等事則用紅裏黃摺以歸畫一欽此 十三年二月奉上諭御史德祥奏內閣辦本章程有應歸畫一併須申定責成者三條一摺事皆可行各省本章凡遇關係年月錢糧數目俱係恭繕壹貳叁肆伍陸柒捌玖拾字樣取其筆畫較多難於增改原爲防弊起見惟直隸貴州盛京將軍等衙門及奉天府尹等處均照常繕寫筆畫省減旣不一律恐滋弊端嗣後著一律繕寫至外省進呈本章間有違式錯誤內閣俱票擬飭行暨議處而在京各衙門進呈本章遇有錯誤俱隨時撤出更正辦理亦不一致嗣後各部院衙門本上書寫錯誤著內閣一體票擬應飭行者飭行應議處者議處又內閣設有漢本堂侍讀學士侍讀等員原責令查覈各省進呈本章分別緩急呈進若祇派中書數人管理未免事重任輕嗣後該侍讀學士等除有兼別處行走者不能

專管外其專在漢本堂行走之員所有一切外省本章著責令督同中書等詳細覈辦以昭慎重摺併發欽此 二十四年正月奉上諭本日據翁元圻奏到上年十一月間湖南雨雪情形其糧價及捐監銀數清單俱未黏貼黃面又另摺奏審擬已革守備曾國相盤獲倡婦私留在署一案轉黏貼黃面二摺係同日拜發殊屬輕重失倫翁元圻太不曉事著交部察議嗣後凡遇應用黃摺奏事時其刑名事件俱毋庸黏貼黃面以歸畫一欽此

三月奉上諭本日總兵卓哈納因伊子德亮挑補上虞備用處藍翎侍衛具摺謝恩用黃摺繕寫甚屬非是向來臣工謝恩均用尋常奏事白摺具奏其黃摺原爲尊君之義凡遇慶節令辰特用之以表誠敬若臣下奏謝恩私情豈可漫無區別一體濫用嗣後內外臣工如有謝恩不在慶節令辰期內繕寫黃摺呈遞者即將該員交部議處欽此 道光七年閏五月奉上諭近日吏部戶部帶領引見人員內有刑部郎中明安福理藩院員外郎慶長安二員命名不成文義乾隆年間因旗員取名未當屢次恭奉諭旨訓飭嘉慶二十年欽奉皇考仁宗睿皇帝諭旨旗人命名有取漢文字義者不准連用三字朕御極以來亦因宗室取名未協曾經降旨申諭何以旗員中仍前取名並未一體遵改實屬不合

著再飭諭八旗都統等嗣後旗人取名務宜恪遵聖訓不准連用漢文三字其現在取名未協者亦卽一體飭改欽此 十八年六月奉上諭向來旗人命名如用滿洲蒙古成語自可不拘字數若有取漢文字義者祇准用兩字不准連用三字朕屢降旨明白宣諭近來京外文武各員內仍有連用三字並非滿洲蒙古成語大屬非是著八旗都統副都統各省將軍都統副都統城守尉通飭所屬嗣後旗人命名務當查照歷次所降諭旨永遠遵行經此次飭諭之後儻再有連用三字文義不相連屬並非成語者一經查出定將該管之都統等懲處不貸欽此 十九年五月奉上諭前曾降旨旗人命名若取漢文字義者祇准用兩字不准連用三字其有取滿洲蒙古字義者如非成語亦不准用昨因鑲藍旗帶領引見盛京防禦擬陪之驍騎校命名慶豐阿殊屬非是當經更名慶豐著八旗都統副都統各省將軍都統副都統城守尉等再行通飭所屬嗣後似此滿洲蒙古並非成語及連用漢文三字者概不准命名欽此

### 議奏事宜

乾隆二十五年五月大學士傅恒等議覆奏准無關緊要本章酌定裁減

一八旗補放官員向係各該旗帶領引見述旨後移咨兵部據咨轉行各該旗仍按月彙題此本應刪

一改授庶吉士上諭一道向係具題恭繳此本應刪仍令繳內閣

一盛京莊頭等每年糧石數目向係另本題報應令歸併每年出入糧石並存剩數日本內具題減去本一件

一口內莊頭等每年糧石數目向係另本題報應令歸併每年出入糧石並存剩數日本內具題減去本一件

三十五年七月奉上諭雅德奏查辦收存鈔舊盜甲俟吉林等處需用鐵觔時按鎔化淨鐵之數折給應需驛車照例發用先經咨部請示茲准兵部行令具奏再議等語兵部所辦非是前因各部院將應行奏辦事件駁回該處令其自奏以致輾轉稽延最爲惡習屢經嚴切飭諭並定有咨駁處分今兵部辦理此案何得復行駁令自奏著將該堂司官交部議處並再行通諭部院八旗各衙門嗣後凡遇各該處請示咨報之案除有例可循者仍照常覈議咨覆外若係必須奏請定奪之事無論應准應駁卽著據咨議准議駁奏聞

並將應奏不奏之大臣附參交議不得狃於推諉錮習貽誤公事儻不知悛改復蹈故轍一經察出定將違例咨駁之大臣等一併嚴加議處著爲令欽此 嘉慶十三年六月奉上諭朕每日召見各部院衙門尙書侍郎及卿員等詢及該衙門事務或伊等將現辦案件自行奏言及退出時轉向同官傳述卽以爲業經奏明請旨遵辦朕輪次召對臣工一時面諭之言豈能向其同署諸臣徧行曉示而本人一經傳述各同官又不敢覆行請旨其中每不免有隨同遷就之弊且各部院事件如同官尙未公商定議本不應於一人獨對之時先行奏探意旨或其人先有異見於召對時輒以己意敷陳及出述時辭氣抑揚輕重之間復稍有增減而同官莫能辨正則以影射漸啓專擅其弊尤不可不防嗣後各部院衙門臣工經朕於召見時詢及現辦事件或有面諭之言本人退出後傳知各同官俱著於次日公同繕片述旨如所述不誤發下再行遵辦或所述事件其人面奏之辭與該衙門現在公同商辦之處情節不符卽著於奏片內據實聲叙另候諭旨遵行此係朕防微杜漸之苦心各臣工等凜遵毋忽欽此 二十二年三月奉上諭向來部院遇有議處事件每因查被議之員有無加級紀錄以致議奏遲延嗣後著於奉旨五日之內卽行

議上其例不准抵者於摺尾聲明卽係應以級紀議抵者亦毋庸先行查計著於摺尾聲  
叙例係應行議抵之案可否准其抵銷請旨遵行如奉旨不准抵銷毋庸查計若准其抵  
銷再行查明覈辦欽此 道光十年四月戶部會同內務府議覆奏准各省關稅徵收銀  
兩各按欽定盈餘銀數以六成作爲額內盈餘遇有短少著落賠繳仍按額內盈餘短收  
分數照例議處以四成作爲額外盈餘遇有短少著落賠繳寬免處分短徵額內盈餘著  
賠而復議處短徵額外盈餘免議而仍追賠俱令該關於奏報盈餘摺內分晰聲叙又請  
將各關徵收盈餘銀兩除足額不及一分者無庸置議外其溢收一分以上者紀錄一次  
二分以上者紀錄二次三分以上者紀錄三次四分以上者加一級五分以上者加二級  
此外再有多餘儘收儘解均作五分以上計算以示限制 十一年八月奉上諭內務府  
奏遵旨酌定賠繳關稅短徵銀兩章程一摺各關監督徵收稅課虧缺銀兩上年曾經戶  
部等衙門議定章程奏准遵行所有稅課盈絀均由該監督自行奏報統歸戶部查覈惟  
濟墅淮安龍江西新九江南新北新等五處向由內務府司員簡放遇有短絀除仍照例  
報部辦理迨該員回京到旗往往以欠項較多不能依限赴部完繳輒在本旗具呈懇請

代奏繳銀扣俸各關稅課無論正額盈餘均關經費豈容絲毫短絀近來各關雖頻年奏報虧短總不至如濟墅淮安兩關動輒虧短至數萬及十餘萬兩之多皆由該監督等並不實心經理迨有虧項又復延宕希冀以俸扣抵徒有賠繳之名並無完交之實此而不嚴加整頓何以防流弊而重稅課嗣後濟墅關淮安關龍江西新關九江關南新北新關等五處遇有虧缺關稅之員回旗具呈繳銀扣俸一概不准均令依限完納限滿不完卽著革職監追如監追後仍敢任意延宕不行完交卽著永遠監追其子孫代賠之項亦令依限完納不完照例監追如係赤貧取具參領佐領家產盡絕印甘各結仍查明並無寄頓屬實方准具呈奏明以俸扣抵其監督陞任有奏事之責不依限完繳者亦著一體照例監追至該監督虧欠之項如係三四任一同到限著查明數在萬兩以內者照例一併完納其在萬兩以上者著照依參革降調人員呈明戶部准其接續完交以清官項欽此

是月奉上諭前因各關監督徵收稅課累年虧短銀兩降旨嚴定章程不准於回旗後呈請繳銀扣俸均令依限完納限滿不完革職監追如監追後仍延宕不交卽著永遠監追茲閱戶部單開嘉慶道光年間濟墅淮安兩關歷任監督徵收數目雖間有奏報多收



甚屬寥寥而虧缺者甚多似此任意短少年復一年伊於胡底溯查嘉慶四年欽定潞野關盈餘銀二十三萬五千兩嗣於嘉慶九年加增銀一萬五千兩共銀二十五萬兩淮安關盈餘銀十一萬一千兩嘉慶九年加增銀二萬兩共銀十三萬一千兩今朕酌量裁減著將潞野關盈餘銀減去二萬兩每年徵收銀二十三萬兩淮安關盈餘銀減去二萬一千兩每年徵收銀十一萬兩自此次裁減之後不特將嘉慶九年加增之數全行減去併較嘉慶四年原定之數格外減少該監督等各宜感激朕恩共發天良認真徵收總期於新定數目有盈無絀方爲不負委任儻或仍前玩視以致額外虧缺必將該監督等照前定章程分別革職監追及永遠監追嚴行懲辦決不稍有寬貸凜之慎之欽此 是月奉上諭戶部奏准酌擬關稅賠繳限期以清課額一摺各關監督徵收稅課果能潔已奉公何至累年虧缺盈餘銀兩動逾數萬前經降旨酌減潞野淮安二關稅額該員等尤當激發天良覈實辦理茲據戶部奏稱各關徵收之員任滿時儻有以多報少或於虧缺之數以少報多卽與侵蝕倉庫錢糧無異著責成各該督撫於該監督任滿時就近詳加查訪如有此等情弊立卽嚴參革職送部監追照例治罪儻該督撫徇隱不奏或經朕密查或

有人參奏別經發覺惟該督撫是問至賠繳短徵關稅銀兩嗣後除三百兩以下定限半年三百兩以上定限一年仍照承追例限辦理外其銀數自一千兩至五千兩者予限二年五千兩以上至二萬兩者予限三年二萬兩以上至五萬兩者予限六年五萬兩以上至十萬兩者予限八年十萬兩以上亦予限八年至一人而兩任三任各有虧缺如准其接續完繳限期未免過寬著通計前後所虧銀數之多寡均照此次所定期限辦理經此次酌定期限之後該監督當共知儆惕認真經理不得任意虧缺致干嚴辦除潯墅淮安龍江西新九江南新北新等關五處照此限期辦理其餘京外各關及嘉慶四年盈餘定額之夔關等處有虧缺關稅之員均於關滿奏報及題咨到部之日起各按銀數多寡分別限期久暫以歸畫一餘著照所議辦理並著該部纂入則例永遠遵行欽此 十月戶部內務府會議奏准嗣後左右兩翼山海關張家口殺虎口五關監督差滿奏交內務府盈餘銀兩自奉旨之日起予限一月全數交清儻逾限延宕不能完繳立即由內務府據實參奏請旨懲辦俟奏參議處後再勒限二十日如仍不完繳奏請革職送部監追 十二年四月戶部會同內務府議覆淮安關監督榮桂福泰關稅一年期滿短收額外盈餘

銀兩遵照定例著該監督等攤賠摺內奏准嗣後各關一年期滿無論兩任三任儻於額內盈餘徵不足數及前後任不敷抵補者請按各任覈計短收分數分別議處以示區別

十四年七月戶部遵旨議奏各關監督虧缺正額銀兩欠不及半分者改爲降二級調用欠半分至一分以上者降三級調用欠二分以上者降四級調用欠三分以上者降五級調用欠四分以上者革職仍照舊不再計盈餘處分其分賠著追年限仍遵照道光十一年八月奏定章程辦理等因一摺奉旨依議欽此 二十七年五月戶部奏准嗣後賠交關稅各員於限內交至七成以上者屆限免其革職監追其未交之二成有零另作分數予限完清有官者卽以廉俸全行坐扣俾賠款悉歸有著 二十八年四月本府奏准嗣後各處每年應交淺斤變價銀兩並代交之項務須年清年款不得稍有帶欠儻再因循從事卽嚴行參奏交吏部分別欠數照關稅虧額例嚴加議處 是年五月吏部奏准嗣後各該處交淺斤變價銀兩如有限滿未完照關稅盈餘銀兩未完例由內務府按其未完分數交部議處欠不及一分者免議一分以上者罰俸一年二分以上者罰俸二年三分以上者降一級留任四分以上者降一級調用五分以上者降二級調用其分年代

交之項如有未完者照關稅盈餘銀兩例酌減議處欠不及一分者免議一分以上者罰俸六個月二分以上者罰俸一年三分以上者罰俸二年四分以上者降一級留任五分以上者降一級調用係公罪均准其將尋常議敘及事前捐加之級紀議抵再每年各處應領濫斤以各該處應領之日起按限具文請領如有逾限未領者將承領之員降一級留任勒限飭令趕領如再未領卽照所降之級調用從嚴議以不准抵銷

### 遞奏事宜

乾隆三十九年八月奉上諭向來在京部院各衙門陳奏事件及外省督撫等齎奏差弁赴宮門具摺設有奏事官員接遞轉交奏事太監進呈所以嚴內外之防使宦寺人等概不得與外人交接法至善也乃近來奏事官員日久懈弛致有山東隨至天津之參將王普與太監高雲從認識聽其囑托高雲從不過寫字處下賤太監何得與外省參將相識則是太監等與外廷官員在宮門覲面交談之處大概可知奏事處向派有御前侍衛一員管理原以察查各項弊竇今春寧在奏事處於此等情事不能稽查所司何事春寧不必管理奏事處之事仍交御前大臣等議罪另派安泰代管安泰向曾管理此事今行走

雖不及昔日而稽查管束尙所能爲務益小心謹慎若再有太監與外廷官員人等在宮門交言識面之處惟安泰是問嗣後除軍機處應奏事件仍照舊交奏事太監呈進外其餘各部院衙門奏摺俱悉從奏事官員接收轉交概不得由奏事太監等接奏大臣官員等並不得與太監交談如敢再有違犯必將伊等從重治罪著將此旨嚴切傳諭奏事處及各衙門知之欽此 嘉慶五年閏四月奉上諭向來恭遇祭祀齋戒日期各部院衙門例不進本但思大祀如圓丘祈穀常雩朕精誠專一祇宿齋宮自應循例不進本章以昭虔敬其方澤太廟社稷均係大祀雖照常齋戒而不親宿齋宮若各衙門本章概不呈進恐致事多積壓嗣後凡遇齋戒日期如圓丘祈穀常雩親宿齋宮之日各部院衙門仍照向例不進本章至方澤太廟社稷致齋三日內除刑部不必進本各部院外省本章有關涉刑名者俱不呈進外其餘尋常事件著各該衙門照常進本卽以本年方澤大祀爲始著爲令欽此 九年正月軍機大臣面奉諭旨嗣後朕詣黑龍潭拈香所有應行值日部院各衙門均著推班欽此 十年十一月奉上諭朕因四公主下嫁後尙未臨蒞賜第俯允所請定於本日前往傳膳此亦典例之常是以前經諭令值日該旗推班各衙門如有

引見官員自可無庸帶領至應奏事件仍應照常呈遞朕未明求衣本日較常時更早原欲披覽事件後前赴四公主賜第回宮辦事召見臣工儘屬從容乃本日文武大小衙門竟無一事陳奏如朕在彼果有竟日盤桓或須晚膳後回宮則尚可以此藉口今朕於卯刻前往膳後詣各廟拈香回宮尚不過辰刻爲時甚早豈本日各衙門竟無一應行陳奏之事乎自係各該大臣等耽於安逸相率在家晏起而轉以仰體爲詞實太不成事體所有文武各該衙門堂官均著傳旨申飭嗣後遇有此等臨幸傳膳日期各該堂官仍應照常奏事如再有藉此曠誤者必當一併懲處不貸將此通諭知之欽此 十二月奉上諭前月二十四日朕臨蒞四公主賜第因各該衙門俱未進內奏事當卽降旨通飭訓諭本日朕詣瀛臺閱看冰鞋各衙門奏事祇有吏部及正黃旗滿洲呈遞述旨並內務府奏事一件綿恩奕紹奏事各一件此外如內廷行走之王公大臣侍衛官員等皆係本應入直者其餘各衙門並不奏事各該堂官均未進朝復蹈前轍朕惟日孜孜勤求治理未明求衣秉燭批章遇有臨蒞地方日期必較常日早起數刻辦事召對儘屬從容而諸臣等每逢車駕臨蒞處所輒相率不行奏事入朝眞所謂上行而下不效試思朕高居宮內辰時

辦事較之曉起傳膳他處豈不安逸且衝寒校藝頒賞係屬年例有何可娛觀之處乃諸臣等任意偷安在家晏起畏避早寒年長者尙可寬恕年少者實堪痛恨自圖安逸轉以仰體爲詞積習不改殊屬怠玩不知振作本日除遞摺各衙門及內庭諸臣外其餘滿漢文武大小衙門堂官均著傳旨嚴行申飭嗣後遇有臨蒞傳膳地方日期各該衙門仍復藉詞不行奏事者必皆交部懲處不能再邀寬貸矣將此通諭知之欽此 十一年三月奉上諭文職各衙門在圓明園輪流值日向遇御門日期除刑部不推班外其餘各衙門皆係推班因思御門理事正以勤政勅幾是以各衙門堂官多有至圓明園者若因御門辦事以次推班是循例輪奏之事轉有壓擱殊失御門本意且刑部並不推班若云刑名事務較繁此外各衙門皆係事簡乎嗣後逢朕在圓明園御門之期所有應行值日奏事各衙門均著無庸推班欽此 十一月奉上諭前經屢降諭旨令各衙門遇有應奏事件卽隨時陳奏毋涉需緩積壓乃本日奏事者又復寥寥惟理藩院具奏謝恩內務府奏回子學生二事此外各該衙門竟無一陳奏事件因檢查憲書今日適係破日諸臣等自緣意存拘忌將應奏事件暫緩呈遞亦屬非是朝廷政事繁多惟日孜孜猶恐不及若稍涉

延緩勢必輾轉沉擱豈不漸滋叢脞之弊向來惟萬壽慶節元旦除夕齋戒期內刑部例不奏事此外並無停止章奏日期若拘於日者家言則翻閱憲書動多禁忌如本月二十七二十八兩日皆係破日又豈皆不奏事所謂一日二日萬幾無曠庶官者顧如是乎著傳諭部院等衙門嗣後於一切應奏事件隨時呈遞勿再存此等拘忌俗見以副朕勤政勅幾至意欽此 十二年十月奉上諭朕本日至承光殿傳膳辦事各部院衙門惟長麟因謝恩遞摺祿康文寧明亮等因該旗值日陳遞無事奏片其餘無一奏事者當於召對長麟時加以詢問據稱本日因恭移實錄聖訓至皇史宬尊藏之第一日典禮吉期是以內閣刑部將刑名章奏均敬謹迴避等語皇史宬安奉實錄聖訓禮節固屬重大但非慶典吉辰可比刑名事件有何不可具奏即朕前詣行禮之日亦惟當停進立決章奏其餘案件皆應奏聞若似此務取吉祥動行迴避庶政豈不多所曠誤乎且本日除刑部外其餘各部院又有何迴避不奏之故明係怠惰偷安憚於早作夙夜匪懈以事一人諸臣竟弗知乎朕一日萬幾罔敢暇逸凡有臨蒞之處批章召對與在宮內無異近年屢因諸臣於朕偶有臨蒞之處不行奏事節次訓飭並加以懲處諄諄教誡實已至再至三而諸臣



積習相循一味自耽安逸轉以恐朕躬煩勞托爲仰體此正巧於偷安罔知振作者朕冬間臨蒞各處皆係年例應往並非無事遊觀朕若日事嬉游樂而忘返諸臣尙應諫阻豈可先自偷安是逢君矣况瀛臺三海等處俱在皇城之內往返不過數刻如每次皆停止奏事則積壓繁多轉行叢脞成何事體在京各部院衙門咫尺禁庭尙且相率怠惰不知勤勉又何况外省效尤滋甚於地方民事率皆疲玩不辦乎本日除內廷行走各大臣及到彼執事遞摺各員外其餘各部院堂官均著傳旨申飭並令伊等捫心自問果否無一應奏之事亦各知愧怍否若將來再不悛改仍前怠玩必當嚴處不貸將此通諭知之欽此 十三年五月奉上諭朕勤求治理惟日孜孜不敢稍自暇逸疊經訓諭臣工恪勤供職以符夙夜匪懈之義乃竟因循疲玩置若罔聞本日各部院大臣因節屆端陽俱來園呈遞膳牌並無一陳奏事件者大屬非是端陽非如朝正鉅典萬壽慶辰例應虔申賀祝於應奏事宜得以量爲從緩若時值元旦萬壽朕亦斷不責令臣工呈進奏章致爲矯情之舉至於端陽不過爲屈原故事舊俗相沿實屬無關緊要非元旦可比諸臣竟因此延擱奏章其意或以爲天中節序未便奏事煩瀆謬爲仰體朕懷而於歷次訓誡之旨不知

領會殊不知朕心轉爲不愜也向來端陽日內廷原有排當承應若值望雨之歲卽行停罷若雨暘時若循例踵行且俱在披閱章奏召對廷臣事畢以後不過二三時卽止於正務毫無妨礙此皆內外臣工所共聞者况寧使庶務稍繁多稽日晷斷無因現值節日竟置公事於不辦也若本日有一二衙門奏事朕亦不遽加責備乃相率延擱轉增朕之咎戾矣臣工等經朕再三訓飭之後尙不知力除積習若不加以懲處不足以示儆戒因召見大學士及部院堂官面加詢問據禮兵二部及都察院堂官僉稱本日實無應奏之事該部院衙門事務本簡卽遇輪班值日亦往往呈遞無事奏片朕所素知尙非遮飭戶部於昨日甫經奏事內務府堂官亦稱本日實無應奏之事俱著免其議處至刑部爲刑名總匯案牘較繁本日例不進刑名本章而該堂官因此意存避忌於尋常事件亦不陳奏究屬拘泥著從寬交部察議其吏工二部不得謂事簡衙門今竟無一陳奏事件殊屬不合該二部堂官著交都察院吏部議處嗣後再有應奏不奏任意積壓不止議處必行革職勿謂不教而懲言出法隨絕無情面諸臣其慎之自十四年始每遇端陽俱不必推班仍照常值日奏事不必來園呈遞全牌用副朕勤政勅幾至意欽此 十一月奉上諭朕

因部院衙門向來辦事每多因循延擱節經降旨訓諭乃昨日遞事者僅止禮部會同內務府奏事一件除此無一件陳奏者又無一引見人員本日則各衙門多有陳奏事件並各員引見兩日之間事務繁簡不同殊非認真辦公之道昨日若云無事何以今日如此之多朕日理萬幾未嘗稍懈並不因偶值事多憚於省覽正恐或有閒曠易滋積壓之弊而諸臣等往往性耽安逸圖便已私其身兼旗務者或俟本旗值日之期始行奏事又或探聽是日有無外傳地方希省早起並不將應辦公務隨時陳遞以致多寡懸殊居心怠玩實屬非是嗣後各大臣務宜恪勤供職隨時辦事隨時具奏毋得稍有遷就觀望致有耽延若再有積壓不奏者即以違旨論罪其無悔欽此 十四年九月軍機大臣面奉諭旨此後駐蹕香山著照萬壽山玉泉山之例各衙門仍挨次值日不必推班如有應行引見人員著照常帶領著爲例欽此 十一月奉上諭本日召見刑部堂官金光悌朱理二人詢及前日所進四川省擬改緩決絞犯王厚成清單接扣舛誤該堂官等因何未經看出據伊二人奏稱向來定案奏稿俱交司官等繕寫校對卽行進呈各堂官從不覆看等語殊屬非是各衙門奏摺均係進呈披覽之件豈有各堂官全不寓目之理乃該堂官之

意竟似一經定稿其校對正摺祇係司官及書吏應辦之事伊等分不當爲即或遇有錯誤不過公同奏請處分迨交部懲處伊等亦恬不愧懼此豈敬事之道嗣後各衙門呈進之件均著該堂官等自行敬謹詳閱即各堂官不能徧閱亦應輪出一二人檢閱無誤然後恭遞設將來進呈之後看出錯誤詢明堂官中無人閱看朕必從重懲處不稍寬貸欽此 十六年六月奉上諭向來九卿科道等遇有條陳糾劾俱係封章入奏呈遞時面交外奏事官轉交內奏事太監直達朕前拆封親行披覽其摺內所奏何事無論外間不應有人傳播即內奏事太監等亦無由得見杜漸防微立法至爲嚴密上月二十八日御史韓鼎晉密奏內城有開場聚賭之事當命軍機大臣傳到該御史詢以所指何人即於二十九日該御史自行覆奏朕始諭令步軍統領祿康等密行查拏卽據先後拏獲賭局共一十六起內有八起於二十八二十九二日散局究係得信逃匿此非有人洩漏或有人探聽御史條奏此事潛向告知致令逃逸而何此時朕姑不深究其人嗣後九卿科道等有陳奏事件如呈遞之前或奏事處及在朝之人向其詢問所奏何事者卽行指名參奏若無人詢問而具摺陳奏之後或向外人敘說亦著聞其言者立卽揭參均當加之懲治

庶不致嘉猷入告以採納之資啓漏言之漸蓋君不密則失臣朕斷不肯先行曉諭以致  
敢言之臣招怨而臣不密則失身近日此風甚熾朕生平最惡者探聽朝政先欲得信之  
人樞機之法榮辱所關有不可不慎者勿謂朕告誡之不早也如敢干犯決不輕恕將此  
通諭知之欽此 十七年六月奉旨本日勒保松筠等奏武英殿校書章程一摺經朕召  
見勒保松筠面降諭旨伊等承旨後自應於次早擬寫述遞乃勒保等輒於本日午刻述  
旨大屬非是向例惟御前大臣軍機處及內務府南書房四處所奉諭旨於本日述遞其  
餘部院衙門均係次早述旨係一定體制勒保松筠二人均職司部務述旨多次豈不諳  
悉舊規此次所奉校書章程諭旨並非不可緩之事朕又未諭令卽日述遞有何迫不及  
待明係伊意存偷安憚於次日起早故爾亟亟殊非夙夜靖共之道勒保松筠著罰俸半  
年其奏事處員外郎德寧率行接收呈遞亦有不合並著罰俸半年欽此 十九年八月  
軍機大臣面奉諭旨嗣後凡遇中祀日期如親詣行禮著無庸進本欽此 二十一年四  
月奉上諭本月十一日輪應鑲黃旗值日是日例不應推班該三旗俱值無事各具摺片  
呈遞蒙古副都統那丹珠因誤記推班日期將該三旗公遞摺片向奏事官員處一同撤

下那丹珠誤記推班其咎尙輕至各衙門陳奏事件應於具奏之前將應遞與否公同酌定若既交奏事官員接收卽應上達朕前王公大臣等斷不准私行撤出那丹珠以內閣學士副都統在批本處行走輒敢如此率意妄爲其重咎實在於此那丹珠著革去內閣學士副都統降三級調用退出批本處現出有鴻臚寺卿一缺卽著那丹珠補授嗣後王公大臣有似此者俱照此降調奏事處官員德寧於該三旗已遞事件聽其撤下亦屬不合德寧著退出奏事處仍交部議處欽此 二十三年二月奉上諭從來人君日理萬幾孜孜圖治復聽政之暇宣講經書以資啓沃二事並行不相妨礙緬維聖祖仁皇帝經筵日講無間寒暑後始改於春秋二仲舉行本日朕臨御經筵六部九卿八旗俱無陳奏事件甚屬非是此次姑免查究嗣後每遇經筵之日除不帶領引見外各部院八旗內務府均著照常奏事毋許曠怠違旨偷安定行懲治不貸欽此 四月奉上諭匿名訐告最爲人心風俗之害其意本因挾有私嫌藉圖傾害一經查辦不特被告之人枉受污讟並波及案外之人酷遭拖累以無名之飛語令官私荼毒平民而陰謀者乃袖手旁觀以快其私忿其險惡之情甚於鬼蜮律載投隱匿姓名文書告言人罪者絞見者卽爲燒燬若將

送入官者杖八十官私受而爲理者杖一百被告者雖實不坐立法至爲明切嗣後凡有拾獲匿名揭帖者著卽將原帖銷燬不准具奏惟關係國家重大事務者密行奏聞候旨密辦欽此 十二月奉上諭向來吏兵二部引見人員俱於次日述旨其有應行謝恩者於再次日具摺謝恩其銓選各部院有述旨者有不述旨者卽如昨日值年旗帶領總管城守尉各員引見本日並未述旨該總管等卽各具摺謝恩辦理殊未畫一嗣後文武各衙門帶領引見俱著於次日一體述旨其應行謝恩人員於再次日具摺謝恩著爲令欽此 道光十三年六月奉上諭前因奏事處率行接收不識姓名人擅遞封章降旨將哈朗阿等分別降調降留並令御前大臣軍機大臣會同妥議章程茲據長齡等詳議具奏嗣後奏事官接收奏章宮內辦事之日著於寅刻在內左門外九卿值班房接收圓明園辦事之日在出入賢良門外朝房內接收如遇臨幸各處卽在該處宮門外朝房內接收每日接遞之際著奏事官先接尋常摺奏再接封奏務當逐件詳慎檢明其聯銜封奏及尋常摺奏均著各衙門出具印片交該遞摺官員等隨摺交奏事官以憑覈對至單銜遞奏封章者自親王以至御史均著親身呈遞該奏事官如有查明匿名奏章及形跡跪詐

實在可疑之人除將呈遞之件存留一面指令黏竿處該班侍衛等將遞事之人嚴行看守一面回明御前大臣查明奏辦儻奏事官無故吹求有將奏摺應接不接者即著呈遞之人回明御前大臣參辦欽此 十九年六月奉上諭給事中况澄奏請將假託姓名之揭帖即行銷燬一摺投遞匿名文書告言人罪拾獲者即將原帖銷燬不准具奏定例綦嚴所以戢奸宄而防誣陷也近來人心叵測詭計愈多明知匿名者例不查辦因而假託姓名臚列款蹟希冀拾獲之人不敢隱匿從而查究借得遂其污巖陷害之私此等鬼蜮伎倆既欲陷人於罪中並欲脫身於事外覈其情節較之匿名揭帖尤爲陰險一經陳奏無論查辦是否屬實而爲所指者受累無窮適中其詭秘之計必須嚴申禁令杜絕奸謀嗣後內外大小各衙門遇有此等揭帖如能將投帖之人登時拏獲方准奏明查辦儻帖內雖有姓名而投遞者業已潛匿卽照拾獲匿名揭帖之例當堂銷燬概不准率行具奏仍將投帖之人訪拏到案嚴行懲究至士民編造歌謠詆燬地方各官者前經降旨令各省大吏查明編自何人嚴拏究辦嗣後凡有歌謠關係參款者著仍遵前旨務將編造之人密速訪拏訊明平日有何仇怨從嚴懲治庶澆風可挽而奸徒亦無所施其計矣將此



通諭知之欽此 二十五年七月奉旨嗣後貴妃以下及阿哥公主等遇有舉行吉禮時各衙門應題應奏事件俱著照常呈進毋庸迴避欽此 咸豐元年十一月奉上諭朕本

日出神武門詣永安寺等處拈香悅心殿傳膳辦事惟值日之部旗等衙門奏事甚屬寥寥其餘各衙門竟無一事陳奏豈本日並無應奏之事乎若因朕臨蒞處所或有未便遂將應行陳奏事件改期呈遞名爲仰體實則自耽安逸殊失朕孜孜求治惟日不足之本意嗣後遇有臨幸傳膳地方非經傳旨推班日期各衙門均著照常奏事勿仍蹈因循之習致公事轉多曠誤將此通諭知之欽此 二年四月奉上諭前因內閣學士勝保呈遞

封奏復行撤回當降旨交部察議並將奏事官常通交部議處茲據吏部遵旨具奏並恭查嘉慶二十一年諭旨按照定例將勝保議以降三級調用係私罪不准抵銷常通議以降二級留任例准抵銷分別請旨勝保前奏時務各條原無不合即其風聞失實各款朕亦念其意存諷諫不加譴責惟既經遞摺擅自撤回實屬有違定制嘉慶年間所奉諭旨杜漸防微具有深意煌煌聖諭曷敢不遵勝保即照部議降三級調用不准抵銷奏事官

刑部員外郎常通著照部議降二級留任准其抵銷並著退出奏事處嗣後各衙門及有

言責者陳奏事件概不得遞後擅撤奏事官亦不得任聽撤回如有率意妄爲者著御前大臣查明即行參奏欽此

### 大臣值班

乾隆八年十一月奉旨從前朕詣圓明園主位在城內則請旨留內務府總管一員此次因何不行具奏著問內務府總管欽此 是月奉旨如皇后主位尙可皇太后旣在宮內爾等不行具奏甚屬非是今該王旣輪班住京此次尙可如此嗣後再有似此之處仍著具奏欽此 嘉慶十五年七月總管內務府大臣常福面奉諭旨總管內務府大臣城內值班最爲緊要嗣後該大臣等在城內值班如遇所管部旗各衙門有應奏事件及帶領引見俱不必來圓明園欽此

### 大臣入直

嘉慶五年十一月奉上諭現在時值嚴冬氣候沍寒因念滿漢大臣中年老者遇有陳奏事件若照常於五鼓入朝恐過早觸寒嗣後六十歲以上年老大臣俱著於黎明入朝除單銜具奏之事自應親遞外如係會銜陳奏事件或自揣精力難支卽可不必進朝以示

朕體恤至意欽此 九年四月奉上諭內廷行走大臣每日固應晨趨入直而管理部旗事務者亦應於散直後進署辦事朕駐蹕圓明園時惟軍機大臣每日承旨書諭且外省由驛馳奏之摺不時呈遞早晚或有急宣自無暇分身赴署朕在宮內時偶遇散直較早猶必諭令到署辦事至總管內務府大臣等多係部院堂官兼轄旗務近來每以駐園召見爲辭概不進城赴署况散直甚早又不進城入署辦事在寓所坐待司員回稿殊屬非是朕日常召見內務府大臣不過一二人輪對卽有同時並宣之事缺一二人有何不可何以相率駐彼致曠職任嗣後朕在園時內務府大臣內除並不管理部旗事務者仍應每日伺候外其管理部院旗務各堂官著每日輪流一人進城到署辦事並赴紫禁城內將宮內及各太監飯房一切事就近辦理常川稽查勿得稍有曠誤欽此 九月奉上諭前經屢降諭旨令各該堂官按日至本衙門辦事將所有例案詳細查覈剔除弊竇庶案得以隨時清釐而吏胥亦無由乘機朦混今御史邱勲復有此奏係爲重公務起見嗣後各該堂官除赴圓明園值日奏事之期往返稽時不及再到衙門辦事外若在城無事自應到署率同各該司員將應辦事件悉心覈辦儻無故不到經朕查出必當照例懲處欽

此十年十月奉上諭現在時屆嚴冬氣候寒沍滿漢大臣中年老者遇有奏事等項趁曉趨朝嚴寒倍甚從前曾經降旨諭令滿漢年屆六十以上大臣遇進朝之日准令筆帖式等代遞膳牌著照舊遵行該大臣等可於卯刻進朝聽候宣召其年至七十以上曾賞令紫禁城騎馬之滿漢文武一品大臣內如有不能乘騎者著加恩准令自製兩人昇擡小椅乘坐進內以示格外體恤至意欽此 十三年正月欽奉諭旨滿漢文武大臣年在七十以上者交冬以後著於辰正進內交春以後於辰初進內等因欽此 是月軍機大臣面奉諭旨此後在城在園遇有傳詣地方該大臣等即遵照前旨仍分別於辰初辰正到無庸先往點班欽此 十九年正月奉上諭紫禁城內值班王大臣遇朕駐蹕御園及歲時巡幸尤應嚴密稽查夙夜罔懈近日王大臣等多有怠玩相仍不候接班清晨先自散直者其接班之人遲至薄暮始進內值宿禁城重地每至日間虛曠無人上年九月十五日逆賊約於午時突入禁門未必非豫知守衛空虛乘間伺隙且前已降旨訓飭茲再行申諭嗣後禁城內值班王並內大臣文大臣武大臣前鋒護軍統領俱著恪遵定制各於辰刻至景運門內九卿朝房面行交替接班後仍著在景運門內外班房會集毋許遠

離至申酉之間始准各自散歸值宿處所如有怠惰偷安不候交班先行散去者著接班之人立時具摺參奏無論王大臣即將爵職斥革雖有勲績概不原宥言出法隨各宜凜遵如接班之人狗隱不奏別經查出一併斥革至接班之人若任意延玩過辰刻尙不進內亦著下班之人參奏其紫禁城內各處值班官兵均著王大臣等不時查驗如有曠缺立行革懲再向來在內該班之總管內務府大臣例不值宿每於早間進內游衍數刻即行散去嗣後著日出進內候至申刻始准下直其在內值班之王大臣等是日有無曠誤即派令總管內務府大臣留心稽查違者據實參奏若內務府大臣散直過早王大臣等即行參奏朕仍不時另行派員密查其各凜遵無怠欽此 道光十九年五月奉上諭本月初五日禁城內值班王大臣等進班出班均未面行交替本應遵照嘉慶十九年諭旨概行斥革姑念歲久相沿幾成積習此外未經發覺者尙不止此數人是以恩寬格外量予薄懲因思該王大臣等散歸太早入直較遲皆係怠惰習成性耽安逸朕何難恪守前謨立予罷斥惟伊等咎由玩愒若竟置身閒散轉得遂其偷安自便之私故不令廢棄終身俾可贖前愆而圖後效嗣後該班之王大臣等如輪應進班借詞推諉曠誤不到及出

班之人容隱不奏俱仍照嘉慶年間諭旨革去爵職決不寬貸其進班遲延已逾辰刻及出班之人彼此未經面晤即自散歸並容隱不奏者均酌量情形仿照此次辦理該王大臣等惟當各勤職守夙夜在公毋得日久玩生仍蹈故轍並著將此次諭旨各錄一道懸挂該班處所俾觸目警心共知戒懼凜之慎之欽此 十月奉上諭嗣後內廷行走人員兼各衙門差使者遇有本衙門緊要事件准其赴署辦理其尋常入署均著於辦事引見後前往欽此

### 大臣官員值年

乾隆十六年五月奉旨紫禁城內各處俱當潔淨整齊如有應修之處亦當即行補修豈可致令不潔不整今朕經過地方竟有不潔不整之處此皆內務府總管應行修理之事第因無專司之內務府總管是以互相推諉始至如此嗣後特派內務府總管一員專司其事其派出之內務府總管著一年一換更換時亦著明白查驗交代儻有不潔不整之處經朕查出惟值年內務府總管是問今歲既係初次著派和親王海旺二人俟年滿應換之時將內務府總管開列名單奏請簡派永著爲令欽此 二十六年五月奉旨伍齡

安及太常寺堂官管理餵牛事務官員等俱著交部嚴行議處此項牛隻俱係祭祀應用不便在地處餵養著仍在犧牲所餵養但該所官員所餵牛隻至於如此疲瘦豈可仍交

伊等餵養著將伊等應駁回原衙門者駁回應裁汰者裁汰所出之缺交內務府大臣另行選派官員達他令其餵養牛隻內務府大臣內每年奏派一人值年管理其如何除派

官員頭目更換值年之處著內務府大臣妥議具奏仍交內務府大臣將現有牛隻查明其慶豐司所交瘦小原牛著繳回該司令其賠補更換該衙門所餵不堪應用疲瘦牛隻

著落伍齡安該衙門堂官餵牛官員等更換肥壯者賠補欽此 三十四年十月本府奏

准慶豐司所屬牛羊圈俱係內務府大臣除派該司員每處二員分往值年經管餵養牛

羊口分錢糧內務府大臣內向無專管之人請照犧牲所之例於內務府大臣內欽派一

員值年以專責成俟一年期滿奏請更換 三十六年七月奉旨嗣後房錢庫著派內務

府大臣一員專管此次即派邁拉遜管理欽此 三十九年十一月本府奏准內務府六

庫所存皆貴重之物錢糧出入固宜嚴密稽察請嗣後內務府大臣內特派一員值年俟

一年期滿奏請更換 四十六年豬房事務歸併犧牲所管理所有犧牲所豬房兼管司

員由值年大臣派員兼管 五十二年十一月本府奏准營造司承辦宮內歲修及各等處咨修工程所需銀兩每年約用二三萬之多若無專責之人稽察誠恐日久弊生請照官房租庫牛羊圈之例請旨簡派內務府大臣一員專管俟一年期滿奏請更換 五十七年十一月奉旨此後辦買乾果糖觔著總管內務府大臣兼管每屆一年之期奏請更換欽此 嘉慶十九年九月欽奉上諭賈允升奏太常寺衙門有須整頓一摺犧牲所牛隻挑取烙記之後皆係豫備祭祀供用著總管內務府大臣隨時前往查驗以杜偷減之弊等因欽此 道光二十年八月奉上諭嗣後紫禁城內犧牲所著仍照舊例奏請揀派值年至營造司慶豐司六庫官房租庫乾果糖觔等處所有應辦事件即由該總管內務府大臣等公同辦理毋庸另派值年欽此 是月本府奏准各司處值年司員向係一年更換者由總管內務府大臣公商揀派向無年限者定爲二年期滿更換如遇同時俱換准留一二員以資熟手仍令一年更替

### 大臣官員兼管

乾隆四十八年四月奉旨例載八旗中公佐領員缺文職大臣雖尙書亦得揀派補授兼



管但尙書職任紛繁無暇管理佐領反於佐領事務無益著交八旗嗣後如世管佐領仍照例辦理外若補放公中佐領尙書停其揀派只將侍郎以下人員揀選帶領引見補授欽此 五十一年十二月本府奏准文淵閣原設有辦理事務官四員向於內務府司官內揀選帶領引見令其兼理嗣後應照前鋒統領護軍統領兼銜司鑰無庸帶領引見之例即令該員等到閣行走 五十五年六月奉旨唐古特學事務著德勒克管理其御藥房回子學包衣三旗前鋒營僧道司寶諦寺俱係總管內務府所屬嗣後即著總管內務府管理不必各自分管欽此 嘉慶四年正月奉上諭寧壽宮事務著總管內務府管理不必另行專派欽此 五年閏四月本府議覆奏准壽安宮前一層房間收存撒袋腰刀箭枝等項後層房間收存昇平署錢糧切末等項請派郎中一員員外郎一員管理 六月奉旨將撒袋腰刀箭枝不必移於壽安宮欽此 六年九月上駟院奏准嗣後各圈餵養馬匹仍派本院廉能司官六員阿敦侍衛六員分圈管理停其內務府司官兼理 七年五月本府會議奏准武英殿兼攝官二員御書處兼攝官四員遇有缺出即由該管王大臣酌量於內務府司官咨取二員奏請欽點一員令其兼攝行走御藥房兼攝司官二

員內管領一員副內管領二員遇有司員缺出請於總管內務府大臣所屬各員內擇其人之才具相宜者派令兼攝行走其內管領副內管領遇有缺出行文內務府酌量派給咸安宮官學兼攝官四員遇有缺出行文內務府咨取充補御船處兼攝官二員內裁減一員遇有缺出行文內務府酌量派給樂部兼攝滿署正二員滿署丞二員現因兼攝已久差務較熟毋庸更換遇有缺出照例咨取奏請欽派令其兼攝行走清字經館兼攝提調官一員遇有缺出仍於內務府司員內曾經在館行走者奏派兼攝 六月本府會議奏准文淵閣兼攝司官四員向例由內務府揀派其筆帖式四員係由派出司官等呈堂帶往今請嗣後遇有缺出行文內務府揀選除派 十二年七月奉旨嗣後武英殿御書處兼攝官員由內務府保送著該處帶領引見欽此 十七年十月奉上諭各部院設立司員原令辦理各司事務以專責成間有經該堂官派令兼攝者或因該司事務較繁令別司司員兼辦以資佐理若兼司過多則才長者亦恐照料難周才短者愈致竭蹶罔措均屬有名無實非覈實辦公之道前曾降諭旨令各部司員不准兼三司行走而一人而兼二司者亦須慎擇不可冒濫必該司實在需才該堂官遴選賢員俾令兼辦以資整飭

若因司分之繁簡與司員之才具兩不相宜則奏明對調較之彼此兼攝尙爲覈實儻司員中實有才不勝任者該堂官即應隨時甄劾以重職守不必俟京察之年始行黜退致滋貽誤總之設官分職各有攸司惟期各盡乃心斯庶官無曠府事咸修不必以兼理爲長務虛名而鮮實效也欽此 二十四年六月安徽廬鳳道兼管鳳陽關稅務惠顯來文准戶部具題因該監督一年任滿具文報部經本部檢查檔案並未接收此項報滿咨文當即將該監督任滿照例題請更換並聲明該監督報滿文書遲延隨奉旨鳳陽九江兩關監督歷係廬鳳道廣饒道兼管與別處監督不同嗣後該兩關監督期滿俱毋庸題請更換每屆該道出缺時即以新任道員接管此次鳳陽關稅務仍著惠顯管理欽此 道光十八年四月奉上諭禧恩等奏查閱三旗新建營兵丁步射技藝請酌改操演章程著派奕紀敬徵專管新建營事務並著妥議章程具奏欽此 是年閏四月奉旨新建營著賜名精捷營欽此 是月奉上諭寧壽宮事務著派文慶裕誠管理欽此 二十年八月本府奏准嗣後各司處印鑰郎中內如得其人仍派郎中佩帶亦不拘定先後如不得人即揀派兼司郎中佩帶或由所有員外郎內擇其人去得辦事認真者令其佩帶以專責

成 二十三年四月管理雍和宮事務王大臣奏准該處額設郎中員外郎二缺嗣後遇有缺出毋庸轉補卽由內務府現任司員內揀員奏請兼攝 二十七年十二月本府呈准嗣後寧壽宮兼行之員外郎每屆三年期滿卽著報堂呈請更換

### 大臣官員齋戒事宜

乾隆四十八年五月副都御史吳玉綸奏准舉行祈雨之典所有應行陪祀大小臣工俱著在公所齋宿請嗣後著爲令 嘉慶十二年十一月奉上諭御史胡大成奏請飭臣工敬謹將事以重祀典一摺據稱近聞每值齋戒之期凡應入署齋宿各員多不入署齋宿又伊於從前監禮時曾親見祭告甫畢樂奏未終而執事人員卽喧譁雜沓請飭各部寺院嗣後不得仍前怠玩等語壇廟大祀齋戒及執事各員理宜恪恭將事以昭誠敬向例特派大員稽察並令科道查齋監禮立法已極詳明惟奉行日久在齋戒執事者未必能仍前嚴肅而稽察監禮者亦卽視爲具文殊非潔蠲之義其例應入署齋戒之員或因職守不同間有假廟宇齋宿者亦應將所宿廟名由本衙門咨報俾有考覈至祭告甫畢執事者卽喧譁雜沓該御史從前監禮時旣經親見何以並不封上彈章默爾而息嗣後各

部寺院衙門惟應聲明舊例凡應齋戒執事各員務各小心謹恪毋得稍存怠忽其派出查齋之員向來稽查過早齋宿者或尙未到署即已到各員一經查竣仍可散退未免習而生玩此後查齋之員必當於傍晚時始行查察如有違例懈忽者即著據實參奏以肅祀典欽此 十九年九月奉上諭賈允升奏太常寺衙門有須整頓一摺太常寺人員職司壇廟執事每遇祀事自應致齋誠懇以肅明禋嗣後執事官員俱著晝夜在本衙門齋戒並著查齋科道據實確查如有不在衙門者即行參奏等因欽此

### 大臣官員子弟隨任

乾隆七年正月奉上諭向來旗員子弟自幼隨任在外年至十八歲者例應來京若有欲留任所協辦家務者准督撫代爲題請聽候部議其新授外任之員子弟在京長養年過十八歲以上者非奉特旨不得隨往此舊例也朕思旗員子弟不許擅隨任所者一則恐在地方滋事一則留京以備該旗當差如外任旗員能嚴加約束爲督撫者又不時稽查則皆知守分循理可無慮其多事至該旗佐領若本有可以當差之人而父兄外任者將子弟帶往則本人即可省兩處之食用該佐領閑散之人又得當差支領錢糧以資養贍

洵爲兩便之道嗣後外任旗員子弟年至十八歲以上者在外仍令該督撫題請在內著呈明該都統查奏俱准其隨任其不願隨任者亦聽之若隨任之後或出署交遊及干豫地方之事著該督撫即行查參從重議處欽此 五十年三月奉旨從來滿洲世僕原以侍衛栢唐阿係近御差使視爲榮耀於揀選侍衛栢唐阿時甚屬情願今觀在京文武大臣外任大臣官員之子弟每在各館行走或謀捐納文職官者較多且牢隨伊父兄任所竟不願挑侍衛栢唐阿者尤多於是挑取侍衛栢唐阿時不但乏人及其成丁竟不充當正項差使久在外任並不習學清語騎射技藝竟至廢棄滿洲舊業矣皇祖年間即行查辦一次今在京文武大臣外任大臣官員均沾朕厚恩得項較多尙屬殷實其成丁子弟尤當挑取侍衛栢唐阿宣力奮勉始合滿洲世僕之道曾經降旨命軍機大臣詳查開單進呈經朕指出年已及歲者即行帶領引見但年未及歲者若不定限查辦相沿日久其舊染習氣必至復生著交八旗將現在指出隨在外任年已及歲人等即刻咨取到時帶領引見外嗣後著該旗五年一次照此查明送至軍機處彙辦請旨具奏再前此准外任大臣官員等奏請隨任一人幫辦家務即朕曲盡施恩藉此儘其所有子孫俱留隨任是

何意見嗣後著交八旗嚴行查察伊等子嗣內年已及歲者只准奏請一人留於任所幫辦家務其餘年已及歲子弟兒孫等全行催令回旗以備挑補差使儻有瞻徇不行催取將該都統一併治罪著通諭八旗各省永示遵行欽此 嘉慶十年十一月奉旨軍機大臣等奏查出乾隆五十年間著將八旗在京文武大臣及外任大臣官員之子弟五年查覈一次由該旗送至軍機處彙題以便挑取侍衛栢唐阿等因降旨一道謹遵鈔錄請旨等語自乾隆五十年間遵旨查辦以來惟五十五年復經查辦一次所有乾隆六十年嘉慶五年俱應查辦而未曾查辦今既相隔一十五年宜遵原奉諭旨查辦著交八旗包衣三旗即照乾隆五十五年所辦之例於在京文武大臣及外任大臣知府以上大員子弟內查明年已及歲者各造冊送至軍機彙題除經朕指出者帶領引見外仍交八旗包衣三旗嗣後五年一次照此查辦欽此 道光二十二年四月奉旨內外大臣官員等子弟向遇五年查辦一次挑選侍衛栢唐阿嗣後如遇挑選侍衛之年大臣官員子弟著毋庸列排欽此 咸豐元年二月奉旨從前每屆五年一次將內外大員子弟查辦以侍衛用自道光二十六年查辦後又屆五年惟思該大臣子弟內或身體軟弱騎射生疎或自幼

讀書未能兼習騎射似此等者即用爲侍衛焉能得力自應稍爲變通嗣後在京文職三品以上武職二品以上在外文職自總督至按察使武職自將軍提督至總兵之子弟內及歲時呈報該旗造冊咨送軍機處彙奏帶領引見儻身體軟弱騎射生疎即著該大臣據實呈報該旗轉行軍機處勿庸備挑以示朕教育旗人至意欽此

### 大臣官員妻服事宜

嘉慶十七年七月莊親王綿課等議奏嘉慶十七年六月奉上諭本日奕紹奏因有妻喪懇請賞假數日已有旨給假矣近來王公大臣等遇有妻喪有自行陳請賞假者有同官代爲面奏降旨賞假者又有不敢乞假者亦有托病在家料理者又有竟不請假照常當差者殊屬非是夫婦居人倫之一服制期年自應明定給假章程以飭倫紀嗣後王公及滿漢文武大臣官員等遇有妻喪除遵照定例期年之內不與朝會祭祀外其初喪時應如何分別等級給予假限及如何報明陳奏之處著交軍機大臣會同宗人府禮部詳議具奏載入會典欽此臣等伏查大清通例夫爲妻期服又會典載八旗舊制妻喪持服兩月乾隆十一年議准官員喪服不得藉名爲偷安之計凡親伯叔父母親兄弟妻已授室



之子及養母庶母原定爲持服兩月者改爲一月後即剃頭當差至大臣官員持服日期其職任官差各員應令各量職任於應行走之時即令當差行走各等語是官員遇有妻喪八旗持服兩月而官員准於一月後剃頭當差漢官持服期年而例無給假明文至大臣等又令各量職任分別行走當差日期舊例本未畫一各大臣中遇有妻喪有奏明請假一旬半月者亦有托病請假者並有不敢請假者若非酌定期別以等差誠於體制未備臣等悉心酌議嗣後官員遇有妻喪除宗室隨旗行走之不入八分公以下八旗閑散世職公以下文職翰詹科道及郎中以下武職大門上侍衛及翼尉參領冠軍使以下各令報明本旗本衙門分別咨報宗人府吏部兵部仍准其給假一月外其在御前乾清門行走之王公大臣南書房尙書房行走之大臣官員軍機大臣總管內務府大臣俱令囑同官代奏准給假十四日其餘不兼職任之王以下入八分公以上令報明宗人府轉咨御前大臣及軍機處部院旗營文武各大臣京堂官令報明本衙門於奏事摺內註明散秩大臣令報明侍衛處御前乾清門侍衛令報明該管大臣宗室王公兼職任者即各照職任之例俱准給假二十一日各於假期滿後一體行走當差其期年內不與朝會祭

祀典禮之處仍遵舊例俾大小官員等各盡私情亦不致有曠公務等因具奏奉旨綿課等奏會議王公大臣官員等妻服給假限期一摺內御前乾清門行走之王公大臣南書房尚書房行走之大臣官員軍機大臣總管內務府大臣等原議令同官代奏給假十四日之處著改爲同官具摺代奏餘依議欽此

之... 兵部... 兵部... 兵部...

其... 兵部... 兵部... 兵部...

所... 兵部... 兵部... 兵部...

但... 兵部... 兵部... 兵部...

雖... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

亦... 兵部... 兵部... 兵部...

欽定總管內務府現行則例

堂上卷四

稽查陳設

乾隆六年九月奉旨現今湯泉喀喇河屯南石槽行宮俱經見新修理仍著每年黏修其餘行宮俟見新修理後朕降旨再行歲修口內行宮交湯泉總管口外行宮交熱河總管每年夏季後該總管等親往一次將一應黏補修理之處踏看修理用過錢糧數目著於歲底呈報內務府總管俟五年後將修理行宮用過錢糧以及行宮內陳設懸掛一應等物除派內務府總管大臣一員詳查具奏將此永著爲例欽此 四十三年閏六月本府議覆奏准據東陵總管內務府大臣保寧奏稱東路行宮陳設歲修等項亦請照北路之例一體派員查驗一摺查各處行宮一切陳設並歲修工程均關緊要應如保寧所奏請嗣後東路行宮陳設歲修工程亦照北路行宮之例每於年底派員清查一次每五年一次由內務府奏派大臣一員查覈外至西路行宮亦應照東北之例一體派員查驗以歸畫一 四十七年十一月本府奏准靜宜園一帶地方遼闊宮殿廟宇各等處陳設不下數千件若不立法稽查恐日久弊生請照湯泉行宮之例每於年底派員清查一次每五

年一次由內務府奏派大臣一員查覈以免舛錯 嘉慶五年八月管理靜明園事務大臣豐伸濟倫等奏准靜明園現在撤交陳設應請照靜宜園之例每年派內務府司員查一次每遇五年奏請欽派內務府大臣清查一次 十年七月管理清漪園事務大臣縕布等奏准清漪園現在撤交陳設應請照靜宜園之例每年派內務府司員查一次每遇五年奏請欽派總管內務府大臣清查一次以昭慎重 道光二十三年二月奉旨本日內務府具奏擬請嗣後每間三年派委司員前往東西北三路行宮查驗鋪墊等項一次一摺著改爲每屆五年由內務府大臣派員前往各路查驗一次每年仍由該管行宮大臣派員清查後分款造冊咨送內務府備案欽此 十一月本府奏准嗣後熱河園庭等處行宮陳設及各廟香燈供獻動用經費銀兩改爲間三年派委司員前往清查一次每年仍由該總管等清查後分款造冊咨送內務府備案

### 管理家務

乾隆四十年十月奉旨六阿哥家務事和爾經額不必管理著派英廉管理十五阿哥家務事著派邁拉遜管理嗣後阿哥娶福晉後即奏請派內務府大臣管理永著爲例欽此

嘉慶十四年二月總管內務府大臣阿明阿面奉諭旨織染局事務著常福署理嗣後阿哥家務及公主家務均不必奏請代署欽此

### 鄉會試事宜

嘉慶十二年四月禮部具奏監生那彥堪係由大員子弟挑爲黏竿處栢唐阿可否准其鄉試一摺奉旨那彥堪著准其鄉試嗣後各項栢唐阿內有係貢監生員者均著准其應試其緣事罰充栢唐阿仍不准其應試著爲令欽此 二十四年閏四月奉上諭御史喻士藩奏繙譯會試請照文會試之例一體覆試一摺所奏甚是國家設立繙譯鄉試會試原令旗人嫻習國書以圖上進今據該御史奏稱應試之人往往倩人槍替而通曉繙譯者因此牟利轉終身不願中式此事朕頗有風聞近科繙譯取中之人竟有不能清語者實屬冒濫既往姑免深究嗣後繙譯考試不但會試應照文闈例覆試即鄉試亦當一體覆試俱著禮部奏請於揭曉後定期傳齊中式之人在內廷覆試屆時欽命試題並派員監察以杜倖進而覈真才若查出情弊立置重典慎之戒之勿謂不教而誅也欽此 道光十二年閏九月奉旨前據那清安等奏參該旗官卷送考冊籍錯誤請將佐領參領議

處當降旨將嗣後例編官卷應如何詳慎稽查不致列入民卷並送考冊籍不致遺漏錯誤之處交禮部妥議具奏茲據查明覆奏順天府歷屆鄉試試卷均係照例辦理立法本極爲詳備此次錯誤實由該旗送考冊籍漏填官卷以致誤入民卷取中嗣後旗人應文鄉試者著各該旗照例將應編官卷各生履歷詳細造冊一面咨送順天府辦理試卷一面咨送禮部以備查覈其參佐領等官承辦造冊與外省事同一律嗣後各該旗遇有應編官卷由本家呈報佐領由參領詳加查覈造冊送順天府後其試卷應註明官字如有混入民卷取中者比照各省辦理官卷朦混出結及朦混造冊各員處分例查係本家漏報將本官革職本生黜革查係佐領漏報將該佐領降二級調用並將不行詳查之參領降一級調用如墨卷本有官字硃卷漏印官字戳記將承辦之員降一級調用均著照所議辦理其各該旗都統副都統於參佐領辦理送考冊籍均有稽查之責儻例編官卷遺漏錯誤俱有應得處分嗣後應如何處分之處仍著禮部議奏欽此 是月奉旨前據禮部議覆各該旗參佐領辦理送考冊籍遺漏錯誤嗣後比照各省辦理官卷各員處分例業經照議辦理其各該旗都統副都統等均有稽查之責儻將來應送冊籍有遺漏錯誤

之處自應予以處分當降旨仍令禮部議奏茲據奏稱嗣後八旗滿洲蒙古漢軍及內務府儻於例編官卷遺漏錯誤該都統副都統總管內務府大臣失於查察請比照外省巡撫學政失於查察例罰俸一年著照所議辦理欽此

### 考試御史事宜

道光十九年五月軍機大臣面奉諭旨嗣後考試御史遇朕在宮內時著在乾清宮考試其駐蹕圓明園日期即在正大光明殿考試此次考試即照此辦理欽此

### 繙譯進士分部行走

嘉慶十六年十月奉旨善慶著掣籤分部行走嗣後內務府人員中式繙譯舉人仍在內務府補用其中式繙譯進士人員著與八旗繙譯進士一體籤掣分部行走欽此

### 旗員告假事宜

乾隆四十四年五月兵部議奏嗣後旗員告假逾限十日以上者罰俸三個月一個月以上者罰俸六個月兩個月以上者罰俸一年三個月以上者降一級調用六個月以上者降二級調用九個月以上者降三級調用雖有加級紀錄不准抵銷一年以上者革職外



省駐防旗員告假俱照此例辦理 五十七年三月奉旨鑾儀衛奏治儀正喀隆阿請假前往伊父任所省親所奏殊屬錯謬旗員等因伊父母在任病重親往省視或因病故請假接靈尙有藉詞今喀隆阿之父並無事故而以探視請假何所取意若皆如是效尤請假則旗員等至全行請假省親矣該大臣據此轉奏殊屬錯謬嗣後似此無故請假者俱不准行欽此 嘉慶十一年十二月吏部議奏嗣後遇有現任文職及候選各官如祖父母在任有故該員並無可靠之子止有其孫可以前往者准其告假前往如胞伯叔父母及胞兄弟樞櫬眷屬往回該員親子尙在年幼亦准胞姪及胞兄弟告假前往其非期親伯叔兄弟概不准告假護送至新放外任之員令親子姪護送前往者應由各該旗自行奏請不准率行咨部告假等因具奏奉旨依議欽此

### 終養事宜

乾隆五十年二月吏部議奏外任旗員有呈請終養者未便令其在家閑居應照候補候選旗員親老改補京職之例帶領引見請旨對品以京員改補 嘉慶十二年五月吏部議奏據御史牟昌裕奏內外各衙門獨子出仕親年至七十八以上未經迎養又不自

請回籍終養者無論大小官員通飭自行陳請回籍終養一摺應如該御史所奏內由吏部外由各省督撫飭查如有身係獨子未經迎養各員又未陳請終養者均令其陳請終養等因具奏奉旨依議欽此

### 畫稿事宜

乾隆十三年閏七月吏部奏准嗣後各部院衙門凡辦理事務須滿漢司員公同酌議畫押齊全然後呈堂除稿內註明患病出差及各項事故不行畫押者毋庸議外儻有稿不畫又無事故填註應將此無故不畫押之員與畫押之員一例議處其或不畫押之員本有出差等項事故而同司之員失於查明漏註准該員自行呈明行查確實免其處分將失於查註之員照遺漏造冊例議處等因具奏奉旨這所奏是依議欽此 二十九年三月奉上諭近聞各部院辦事惟司員說堂畫稿而各司筆帖式經年不得見堂官其所熟習者不過跟班數人而已筆帖式將來俱可陞用司員若該堂官未經謀面遇有保題陞用之處祇以司官之言爲憑於理未協該堂官自應於筆帖式內留心察看遇有堪以造就尙能辦事者時加訓勉以期有成嗣後各衙門司員說堂畫稿時並令筆帖式隨同

行走仍就各該處筆帖式人數多寡酌定班次輪流上堂識認則堂官自可悉其才具因材造就如有怠惰庸劣之員該堂官亦可隨時參革欽此

### 堂筆帖式添養官馬

乾隆三十四年十二月本府奏准三旗披甲人等拴養官馬九十九匹內裁減三十三匹其餘六十六匹內撥三十三匹賞給堂上筆帖式等拴養

### 隨帶聽差人員事宜

嘉慶四年正月奉旨八旗都統副都統前鋒統領護軍統領及管理各營大臣等向例俱有跟班親隨原爲公事起見以代該管大臣等宣事傳言而設非視同僕役而驅使之也自當於兵丁內挑選二人跟班今皆由驍騎校護軍校中挑選作爲親隨甚屬不合伊等品級雖微俱係職官各有應辦之事乃轉捨公務以隨大臣成何體統嗣後都統副都統等著改用馬甲前鋒統領護軍統領及管理各營大臣等皆由前鋒護軍內各准挑取親隨二名跟班永不准挑派驍騎校護軍校著爲例欽此 十三年六月奉旨朕昨日乘舟上岸查看親擬地盤見刑部查工司員竟帶家人進內大屬非是除另降諭旨懲處外嗣

後如遇派出王大臣等至圓明園長春園綺春園熙春園查看工程定親王准隨帶二名或太監或家人均可各部院大臣准帶家人一名至前往何處查工均著前一日豫期奏聞次日方准進內若在宮內查工無論王大臣均不准擅帶私人行走即旗下太監亦不准進來至蘇楞額常福尋常進園查勘亦均於前一日奏聞自郎中和明以下均不准隨帶家人自此次嚴禁之後不但查工即尋常每日進內皆照此例王大臣等如有逾額多帶及司員仍敢私帶家人一經查出定行從重治罪決不寬貸欽此 是月奉旨園亭禁地規制綦嚴豈容有閑雜人等輕易擅入昨見長麟廣興查估知樂軒工程所帶人數過多當經降旨飭查據單內所開如書算畫樣及夫匠人等皆係承辦工作之人自應帶入以便估驗至家人一項豈所應有此次長麟廣興二人實無隨帶家人且長麟等皆並曾向司員等囑咐不可帶人而員外郎錫綿等五員仍各私帶家人混雜入內殊屬非是員外郎錫綿吉祿主事崇慶德恒幫辦司務名祿均著交部議處長麟廣興失察司員等混帶家人並著交部察議嗣後酌定限制凡查勘御園內工程定親王綿恩准其帶跟役二名各部院大臣准其各帶家人一名司員等不准隨帶家人至於查驗宮內各處工程無

論王大臣均不准隨帶跟役家人每遇查工著各衙門及該處將出入人數嚴密稽查如查有浮帶之人即行參奏該司員等尙係初次違犯懲處尙輕將來若再有故犯之人必當重處不貸欽此

### 督催事宜

雍正十二年十二月總管內務府大臣盛安奏准內務府亦請設督催所照刑部工部督催所例於司官內揀選幹練者二員令其專司督催各司等處應辦事務視其事之繁簡註與限期令其依限完結設清漢字筆帖式各三員書吏二名聽差人六名統聽司員董率辦理 十三年十一月本府奏准將督催所應辦事件及筆帖式人等俱歸併堂郎中堂主事管理其司員二員仍歸本司

### 督催條例

一凡各司各處鈔出各部院衙門八旗等處咨文併本府本摺堂鈔及一應付咨事件俱於即日報明註限應付咨完結者勒限十日應呈堂完結者勒限十五日應呈堂咨結者勒限二十日應題奏者勒限三十日俱令其依限完結報明銷限逾限者記過如實

有不能依限完結者該司該處於限內將不能依限完結情由備具印文聲明展限如原限已滿始行展限者仍以遲延記過再將一應來文本摺堂鈔各司各處呈稿每日按件查對如有遲漏註限者將筆帖式記大過一次掌稿筆帖式記過一次如事關緊要有意遲漏希圖朦混者卽行回堂參處

一凡都虞司會計司慎刑司營造司掌儀司列爲繁司廣儲司銀庫皮庫磁庫緞庫衣庫茶庫慶豐司管理三旗銀兩莊頭處織染局掌關防內管領處官房收租庫管轄番役處三旗參領處列爲簡處繁司一月之內勒限事及三十件無一事逾限者筆帖式記功一次二月之內無一事逾限者掌稿筆帖式筆帖式各記功一次三月之內無一事逾限者官員掌稿筆帖式及筆帖式各記功一次儻有一月之內逾限三事者筆帖式記過一次四事者掌稿筆帖式及筆帖式各記過一次六事者官員掌稿筆帖式各記過一次筆帖式記過二次簡處一月之內勒限事及三十件無一事逾限者毋庸議外二月之內無一事逾限者筆帖式記功一次三月之內無一事逾限者掌稿筆帖式筆帖式各記功一次四月之內無一事逾限者官員掌稿筆帖式及筆帖式各記功一次

儻一月之內逾限二事者筆帖式記過一次三事者掌稿筆帖式及筆帖式各記過一次四事者官員掌稿筆帖式各記過一次筆帖式記過二次每月將各司各處有無逾限遺漏應記功過及已未完結情由呈明存案繁司定以三月簡處定以四月將所記功過彙總開列呈堂交慎刑司將記過人員依律定笞按例折贖其收贖銀兩交慎刑司存貯至歲底將收貯銀數呈明堂郎中主事將記功人員擬以等第呈明分給以示獎勵儻官員筆帖式等大小過犯收贖三次者另行呈明定奪參領佐領管領等項官員比照司官例記註功過各該處頭目庫使庫守栢唐阿等項人員比照掌稿筆帖式及筆帖式例記註功過佐領管領下領催比照筆帖式例記功至一月之內逾限一事即記過一次不准折贖

一凡特派官員辦理事件由都虞司報明註限限內不完該員自行展限如逾限不完雖屬一事亦記過一次如該員限內完結辦理妥協堂批有可嘉字樣者雖僅一事亦記功一次

一凡各該處堂呈一經送堂無論有無印記關防發鈔之筆帖式卽鈔錄註限其具呈官

員一面將堂呈送堂一面卽移付該處儻鈔筆帖式祇掛其名不行鈔錄或具呈官員既將堂呈送堂不卽移付該處查出照遺漏遲延例記過

一凡各該處請限定限展限堂呈如不先送堂查對卽行呈堂則係該處自行定限必妄希寬裕多開日期實於公事無益嗣後令各該處將一應請限定限展限堂呈於未經籤押之前先送堂查對量事定限如未經送堂查對輒行呈堂者查出將承辦人員各記過一次

一凡各部院衙門八旗等處來文及交發堂鈔該處一經鈔出卽赴堂註限各該處互相付咨事件於文到日卽赴堂註限儻逾三日不行註限者將鈔鈔之人批記遺漏記過一次

一凡堂交事件內有發鈔後再交批語或另交堂諭該處鈔出來報者如原文已經註限卽行添註本號之下如原文雖無庸註限而批語與堂諭又應註限者卽行註限儻該處已經鈔鈔並不來報者批記遺漏

一凡各該處一應司印咨行事件無論曾否勒限遺漏人員記過一次每至三個月月底將



所有記過人等詳加查對除記過一次者從寬免議外凡有職官員記過二次者罰俸  
兩個月記過三次者罰俸三個月無品級人等記過二次者交慎行司鞭責二十不准  
折贖記過三次者鞭責三十若勒限事及百件俱能如限完結無一事逾限遺漏者將  
承辦之有職官員賞給紀錄一次無品級人等於內府官員應得當舖滋生銀兩內酌  
量賞給俟京察軍政揀選時視其有無記過分別優劣每三個月一次彙摺奏聞承辦  
督催查覈錢糧事務之坐辦堂郎中主事筆帖式等一年之內果能實心查催照例奏  
請議叙儻不實力查催有意瞻徇者聲明情由參奏議處

四月呈准

一凡都虞司會計司掌儀司慎行司營造司擬爲事繁之處廣儲司銀庫皮庫磁庫緞庫  
衣庫茶庫慶豐司管理三旗銀兩莊頭處官房收租庫掌關防內管領處管轄番役處  
織染局三旗參領處擬爲事簡之處各該處如有逾限事件俱照依原奏分別繁簡記  
過

一凡奉旨特交速議緊要案件不拘常限即行催令該處辦理題奏外應題奏完結者限

三十日應呈堂咨結者限二十日應呈堂完結者限十五日應付咨完結者限十日如限內不結逾一日卽批記逾限一次批記逾限後仍怠忽從事並不上緊辦理者計逾限日期較原限過半卽批記逾限一次題奏案件內如已經具奏而仍須咨行者自具奏之日起應呈堂咨結者限五日應付咨完結者限三日如不依限完結照例批記逾限

一凡本府補放文武官員及陵寢盛京烏拉達里崗崖等處咨送本府帶領引見官員於雍正七年曾經奏定期限但相沿日久未盡遵行今應如原奏除陵寢盛京等處咨送引見之員於文到日限三十日引見完結外本府應行補放文武官員每月月底令該處將有無員缺印文呈堂文職員缺遵照定限辦理武職等缺令各該處遵照定限辦理俱於次月完結儻無故遲延逾限照原奏參處

一凡三月之內應賞紀錄銀兩人員將該司該處祇將承辦事務之人開送將應得紀錄銀兩照例具奏賞給應行記過人員無論記過次數之多寡亦令將該司該處承辦事務之人開送照例記過儻該司該處以逾限事件承辦並非一人或多送一二人者仍

照應行記過次數一例記過並不以該司該處所送人多分記其過

一凡應議賞罰人員職名每月由堂發鈔催取係隸七司及管理三旗銀兩莊頭處官房收租庫織染局者將承辦事務之官員掌稿筆帖式筆帖式開送係隸六庫者將承辦事務之官員司庫無品級司庫庫使開送係隸內管領處者將承辦事務之掌關防內管領副內管領掌稿筆帖式筆帖式開送係隸管轄番役處者將承辦事務之官員掌稿筆帖式筆帖式番役頭目番役開送係隸參領處者如應賞紀錄銀兩將值月參領參領處行走之驍騎校領催開送如應行記過將值月參領參領處行走之驍騎校及遲延事件之各佐領管領下領催開送外併將參領處行走之領催亦行開送一併記過此外如各該處另有別項承辦事務之人應一體開送者令其於開送職名時聲明情節一併開送

一凡各該處年例應題應奏應呈應咨事件照原定限期查催如至逾限或呈堂參處或記過收贖視事之輕重酌量定擬

一凡各該處黃冊藍冊月摺及一應關係錢糧題奏銷算本摺堂呈各該處俱將稿冊呈

送詳加查覈照對原文如有舛錯遺漏或呈堂參處或記過收贖視事之輕重酌量定擬

乾隆四年二月奏准嗣後除事關緊要該處故爲耽延或妄希隱匿有意遺漏以及辦理錯謬者查出不拘定限卽行參奏外其餘應行勒限事件一經批交該處卽照定限催令完結如果限內實不能結准其聲明情由呈堂展限儻無故逾限酌量承辦事務繁簡分別記過如事繁之處一月之內逾限三事事簡之處一月之內逾限二事將承辦人員各記過一次如應行勒限事件而該處並不報明註限以致遺漏者將於未經行文之先俱令持文赴堂報明其已經勒限者照例料理外如未經勒限者於另冊註明騎縫鈐用圖記至收文之處無論有無辦理一經文到亦令持文赴堂報明應勒限者照例註限不應勒限者於前項另冊內填註騎縫鈐用圖記儻該處行文收文並不報明者照遺漏例記過

一凡同一事而二三處來文者於初次來文卽行掛號其續到之文俱於原號註明日期鈐用圖記至銷限時或當咨覆一處或當咨覆二三處必須按冊查對印文銷限

一凡各該處辦結事件務有憑據方准銷限題奏事件據奉旨之本摺銷限咨行事件據堂印咨文銷限呈堂事件據堂呈銷限付咨事件據司印咨文銷限特派事件無印文者據該員之畫押銷限如已經辦理完結遺漏銷限者除按日批記逾限外令其撤取原摺原呈補銷雖付咨事件亦必取具該處印文補銷其無憑據者一概不准銷限

一凡已經掛號事件內有非該處所當承辦應移於他處辦理者必他處已經掛號方可准銷原號仍於所銷之號下註明移於某處字樣以免遺漏註限之弊

一凡勒限事件內或係銷限或係咨查某處及某處查覆等情持印文來報者俱令於文內填註日期按文內日期登記號簿鈐用圖記如無印文或來文內並未填註日期者一概不准註冊

一凡限內展限者自滿限之次日扣算展限後又展限者自初展限滿之次日扣算如已經批記逾限後始行展限自呈堂之日扣算

一凡廣儲司六庫應行勒限事件從前皆係該司筆帖式赴堂註限但六庫承辦事件內應否註限該司筆帖式未能周知恐將應行勒限事件返致遺漏註限嗣後除該司承

辦事件仍令該司筆帖式註限銷限外其六庫承辦事件一經該司批文到庫該庫庫使即行赴堂註限銷限如有遺漏註限及遺漏銷限者將該庫庫使批記遺漏逾限

一凡各該處應回堂補用之無品級頭目栢唐阿領催應掣籤補用之筆帖式庫使庫守領催等缺向無定限每多遲滯且懸缺日久不無情託之弊嗣後應回堂補用或應掣籤補用人員缺出限三日內報堂自缺出之日起限十日令其補用儻無故遲延逾限或缺出並不報明者將該處官員記過一次

一凡各該處承造物件向因並無定限每多積久不竣之弊嗣後凡由堂交發成造一應物件於文到日即令該處赴堂註限除成造零星瑣屑物件臨時酌定期限催令完結外凡需三十日以上限期成造者俱令該處呈定期限送堂依限查催

一凡傳喚人等事件令各司各處於文到日即赴堂註限其原文內已經聲明限期者俱依原限查催如原文內未經定有限期由堂量事定限至人等傳赴該衙門後令各司各處出具已經傳赴保結送堂備案至各司各處勒限事件內有必需傳人到案方能辦理者務令於傳票內註明地名里數按一日五十里扣算限定日期如至限滿之日

既不催傳又不將會否到案之處聲明者即按日批記逾限

一凡各處來文內交納領取之項俱於文到日限十日應交納者查收後出給實收應領取者驗領給發仍持實收印領赴堂銷限如限滿不行交納領取該處或行文催追或駁回原文催文駁文係用堂印者限六日用司印者限三日儻過期並未催文駁文者即照例批記逾限

一凡料估工程及查覈工程等事從前俱限十五日呈堂完結但料估查覈事件務須該員親身踏勘詳細覈算方無舛錯之虞嗣後凡派員料估工程及查覈工程等事除應具奏者照例限三十日完結外餘俱限二十日呈堂完結

一凡各該處定例應行辦理事件俱令按定限完結儻逾限不結除緊要事件即行參奏外平常事件將承辦人員各記過一次

一凡交納銀兩事件或係奏明限期或係呈堂限期或係來文內聲明限期即照原限催追掛號時務將原限查明登記本號之下以便按期扣算外至承催拖欠銀兩仍照定

例一百兩以下者勒限三個月一百兩以上者勒限六個月一千兩以上者勒限一年

催追交納至工程應交餘剩銀兩並官房租銀租錢及各部院衙門八旗咨催應追贓銀及折贖等項銀兩俱勒限二十日催追完結

一凡銀庫查收莊頭園頭牲丁等交納銀兩一項該處並不論人數銀兩之多寡俱係隨報隨交該司咨文到庫該庫即可收覆實無查辦之處如將此等事件亦入勒限事百件之數至三月並無逾限遺漏准賞給紀錄銀兩是以毫無查辦之事濫冒紀錄賞銀似非慎重名器錢糧之意嗣後凡銀庫收覆莊頭等交納銀兩事件俱不准入勒限事百件之數雖無逾限遺漏亦不在賞給之列庶名器不致假冒錢糧亦不致妄耗矣

一凡番役緝捕事件從前因到案無期概未定有限期是以每月緝捕之案堂上雖經註冊批給限期亦祇據其已經拏獲者銷限其未經到案事件從未批記逾限查番役等專司緝捕之責其緝拏事件雖難勒定期限儻不時加稽察恐番役等日久怠生視陳案以爲膜外請嗣後除番役等自行訪拏事件俟拏獲之日照例勒限令其辦理完結外其一應緝捕案件於每月底令該管官員將伊處所有應行緝捕案件共若干件內其已經拏獲者若干件尚未拏獲者若干件之處開寫事由聲明呈堂以備查催如此



則陳案有稽而番役等亦知警惕矣

一凡各該處付咨事件俱憑印文辦理惟都虞司於三旗參領不拘何旗應辦案件概以原鈔交發三旗有無應行辦理及應如何辦理之處參領等未能分晰以致事多參差往返駁查多需時日嗣後都虞司一應交發三旗參領事件俱令其將有無應行辦理及應如何辦理之處於原鈔後分晰批明令參領等查照批語辦理至參領等咨送該司事件內有辦理未協應行駁回者亦令該司於文尾加批明白指示令其查辦至會計司等處於參領原係付咨印文嗣後各該處如有駁查參領事件俱令以印文駁查如無印文不准駁查其都虞司會計司駁回參領事件令參領於五日內查覆如過期不覆批記逾限

一凡特派官員辦理事件如三月之內逾限至二次者將該員記過一次

一凡三旗文武官員應行春季俸銀俸米冊檔參領等於十一月十五日以內移送都虞司該司於十二月初五日以內咨行該旗秋季俸銀俸米冊檔參領等於五月十五日以內移送都虞司該司於六月初五日以內咨行該旗儻逾限不行移送咨行者將該

參領佐領管領驍騎校副內管領領催該司承辦事務之官員掌稿筆帖式筆帖式各記過一次

一凡三旗兵丁栢唐阿等每月錢糧檔冊仍照舊例參領等於每月初五日以內移送都虞司會計司儻逾限不行造送者將該參領佐領管領驍騎校副內管領領催各記過一次都虞司會計司於每月十五日以內咨行該旗儻逾限不咨該旗者將該司承辦事務之官員掌稿筆帖式筆帖式各記過一次

一凡三旗兵丁栢唐阿等應領二月分米石檔冊參領等於上年十二月初一日以內移送都虞司會計司該司於封印以內咨行該旗五月分米石檔冊參領等於三月十五日以內移送都虞司會計司該司於四月初五日以內咨行該旗八月分米石檔冊參領等於六月十五日以內移送都虞司會計司該司於七月初五日以內咨行該旗十一月分米石檔冊參領等於九月十五日以內移送都虞司會計司該司於十月初五日以內咨行該旗儻逾限不行移送咨行者將該參領佐領管領驍騎校副內管領領催都虞司會計司承辦事務之官員掌稿筆帖式筆帖式各記過一次

一凡勒限事件最關緊要如各該處祇令貼寫人以及披甲人等赴堂辦理伊等於該處公務既未深悉必致駁查轉需時日嗣後一應註限銷限展限等事各司各處俱令現任筆帖式參領處令該處行走之領催赴堂辦理庶於公事有益儻仍前祇令貼寫行走及披甲人等赴堂者概行駁回

一凡題奏呈咨事件勒限不過三十日其有請限按其所請限期註冊扣算

一凡各該處勒限事件內如已經限滿而押全未得用印者驗其堂呈如果籤押已全即於冊內註明情節令其三日內用印銷限如過二日者即行批記逾限

一凡各司各處行查事件如咨查後日久不行回覆者除行查外省及盛京熱河等處酌量應行催文之時令各該處行文咨催外凡堂印咨查事件過二十日並不回覆令該處於十日內咨行催文一次司印咨查事件過十日並不回覆令該處於五日內咨行催文一次如堂印咨查事件已過三十日司印咨查事件已過十五日不行咨催即照例批記逾限一次

一凡各司各處勒限事件內有須行查方可辦理事件如行查數次而回覆之日原限已

滿者自滿限之日起給限三日令其辦理完結儻仍不完結批記逾限

一凡三旗參領等一應呈堂咨行事件俱係各該參領酌量辦理如外旗來文一件參領等均應承辦者每至事同一體而辦理不能畫一即行咨覆者在本府雖係分別參領辦理行之外旗即係本府辦理互異於公務實屬無益著交三旗參領嗣後一應事件俱令遵照定例辦理外如一事而三旗參領均應承辦者務令互相咨查定議之後再行辦理儻仍照從前並不經心以致事同一體而辦理互異者一經查出將承辦事務之該參領等各記過一次

九月呈准查覈一應工程如房屋牆垣之類有憑據可查者仍照舊例於工竣之時派員查覈外至於建立橋梁築打地基砌築券洞豎立樁釘凡有應用夯礮之處工竣之後難以查驗交該監督於興工之始查照原估應築土若干步照估修築一步即行呈明派員詳細查驗築過土若干步係素土灰土或係大夯小夯是否與原估相符之處聲明呈堂再京城內外河工程應用樁釘等項物料備齊亦即呈請派員查驗所辦物料數目及長短尺丈是否與原估相符聲明呈堂

十月呈准嗣後三月之內事繁之處逾限三事事簡之處逾限二事將該處官員人等記過一次遺漏事件將遺漏人員記過一次之處仍遵照原奏辦理外其該處官員人等三月之內無論承辦事務之多寡但視其稿上籤押行走者一概記過如三月之內未經行走者免其記過至賞給紀錄銀兩三月之內除該處毋庸查辦呈堂以及付咨等事不計外凡勒限事件內有本摺題奏堂印咨行呈遞堂呈事已及百件俱能如限完結並無一事遺漏逾限者照例奏請將該處官員給與紀錄一次無品級人等賞給銀十兩凡賞給紀錄銀兩者該處官員人等三月之內行走以及七十日事百件之內稿上籤押以及七十件者均查明賞給紀錄銀兩儻三月之內行走未及七十日事百件之內稿上籤押未及七十件者停其賞給紀錄銀兩

六年六月本府奏准所屬七司等處一切應行題奏咨呈及承查承辦事件內儻有遲延逾限等情概不准援引六部各衙門之例計算逾限仍照本府原奏條例按逾限次數分別繁簡記過罰俸以示警惕

七月呈准

一各該處勒限事件前經呈准如限內不結逾一日即批記逾限一次批記逾限後仍不  
上緊辦理完結計逾限日期較原限過半加批逾限等因遵行在案惟是原限有五日  
十日至半年一年多寡之不齊今若於逾限之後概按原限過半計算批記是原限少  
者三月之內動輒即罹重處而原限多者三月之內反得脫然無事揆之情理猶多畸  
輕畸重之虞似應畧加變通以期妥協嗣後各該處勒限事件內原限十日二十日三  
十日者於批記逾限之後如不上緊完結仍照舊例計逾限日期較原限過半加批逾  
限外其原限五日者批記逾限之後如不上緊完結每過五日加批逾限一次原限三  
十日以上一年以下者批記逾限之後如不上緊完結每過二十日加批逾限一次庶  
寬嚴得平無偏枯不均之累矣

一各處勒限事件內有須行查方可辦理事件如行查數次而覆回之日原限已滿者前  
經呈准自限滿之日起給限三日令其辦理完結儻仍不完結批記逾限第查各都院  
八旗咨查事件內有必須鈐用堂印轉咨別部旗查明方可咨覆者而覆回之日若僅  
給限三日令其完結不惟回堂用印辦理莫及且遇有應行查辦之處往往迫於限期

無暇致詳勢必潦草完事希圖卸責者有之亦非慎重公務之意嗣後部院八旗咨查事件內除用司印移查數次而覆回之日原限已滿者仍照原呈自限滿之日給限二日令其辦理完結外其有必須鈐用堂印轉咨查別部旗者該司於轉咨別部旗之便即行知會原行衙門俟查覆到日仍給與咨結限期令其辦理至於呈堂事件內有必須呈堂移查別司覆回方可呈明完結者亦自覆到之日仍給與呈堂限期辦理庶承辦人員得以從容辦理而於公務亦有裨益矣

一從前呈准各該處三月之內有逾限應行記過者將該處官員人等查明三月之內行走已及七十日者均行記過行走未及七十日者從寬免議等因在案第各司官員內賢愚不一其中奮勉急公不敢稍自偷安者固多而希冀僥倖之輩平時並不將應辦事件留心料理直至逾限之後自揣處分難遣往往托病規避爲開脫之計遂於三月之內每月報病七八日待三月彙總合計反得以行走未及七十日脫然局外者間亦有之似此不特怠惰者無以示懲將來應行記過之員勢必人人盡可藉抱病爲倖免之地猶非從前所定行走未及七十日從寬免議之本意嗣後各該處三月之內有逾

限應行記過者查明該員三月之內除派委遠差喪葬服制等事行走未及七十日及實在患病一月之內至二十日以上者准其援例免議外其每月報病七八日者概不准於三月彙總之時接算合計遇有應行記過之處雖未行走七十日仍照例記過庶怠惰知警而僥倖規避之弊自息矣

一凡奉旨特交速議及一切緊急案件不拘常限即行催令該處題奏辦理外其餘一應限期前經呈准應題奏完結者定限三十日應呈堂咨結者定限二十日應呈堂完結者定限十五日應付咨完結者定限十日惟是其中十五日呈堂限期係設立督催之初事屬創始誠恐承辦人員有意遲滯是以比照部限酌量覈減五日乃遵行以來承辦人員往往多至拮据伏查呈堂與咨結事件均係一體回堂畫押初無難易之分其應咨應呈限期似即不便有寬嚴之別且咨呈事件限期業於酌定餘限案內聲明具奏在案其從前所定十五日之限自應改歸原限仍限以二十日辦理以昭畫一

一各司官員有因本司事務記過而於兼管司分或特交事件內復有應行記過之處者向來俱於三月彙題之時將兩處所記之過歸併合計以示懲惕從無因非本司之事



曲爲援免之例今雖遵行但恐相沿日久將來新任司員不知兼管司分特交事件有與本司所記之過一體歸併料理之例因之任意耽延致干重譴均未可定請飭交各該處嗣後各該處司員或因本司事務記過而於兼管司分或特交事件內復有應行記過者於三月彙題之時仍照從前歸併合計一體辦理庶怠惰知警而公務亦不至於羈遲矣

七年五月本府奏准嗣後凡記過官員除無紀錄者仍按次數月分罰俸外其有紀錄官員三月之內記過一次者仍照原奏從寬免議記過二次至五次者於三月彙奏本內聲明緣由註檔俟下次三個月彙奏之期如又有記過之事將從前所記之過一併計算至六次者銷去紀錄一次抵罰俸六個月如紀錄抵完尙有餘過仍計月罰俸

十六年二月營造司呈准嗣後除遇有各處來文行取庫貯什物及咨查案件仍照原定付咨限於十日內辦理完結外遇有咨取成造什物以及黏補房屋牆垣者自來文日起批交該庫作照付咨限例勒限十日令其踏勘料估呈遞該司官等一面畫押交該檔房辦稿呈堂一面交庫作黏補修理成造於二十日完結銷限如遇工程浩大錢

糧甚多非常限能完者自來文日起勒限二十日呈堂請定若干日期按限完結至應奏請然後興修者仍照奏銷例勒限三十日遞稿具奏自奏准日起亦勒限二十日呈堂請定若干日期按限完結再嗣後如呈遞料估及成造之項如有逾限者將該庫作之庫掌催總等職名即時查明送堂按所逾日期照例記過若該司官等不能即時查出以致逾限者將該司官員及該庫掌催總等職名一併送堂記過至呈堂逾限仍照舊例將該值月司員並掌稿筆帖式筆帖式等職名送堂記過

十七年十二月呈准嗣後三旗參領處值月雖責之副參領遇有記過將值月副參領等與本甲喇之正參領一體照例記過如不值月之該參領等應辦事件有逾限舛錯等情一經值月參領查出准其即行呈明將該甲喇之正副參領送堂照例記過儻值月之參領等有瞻徇情面不行聲明者由堂查出即將值月參領與該參領等一併記過

### 承應車轎

凡遇皇后皇貴妃貴妃嬪貴人等往圓明園暨進宮如用黃緞幃轎金黃緞幃轎交掌

儀司移咨鑾儀衛承應如用黃緞幃車金黃緞幃車青緞幃車傳交內管領承應太監等所騎馬匹交上駟院豫備再青緞幃車出入西三所皆據內庭太監傳交轉行景運門護軍統領開西三所後鐵門等門豫備承應

凡在京公主出入據該管事人員傳報所用車輛交內管領承應導引隨從護軍員役交都虞司除派清道關防交營造司知會步軍統領衙門

凡內庭除定例需用物件仍照舊例交該處豫備臨期聽候領用外其一切非關定例應用物件停其口傳概用敬事房圖記支領此內如有立即需用物件無暇行文者准令該處取其支領人員職名畫押領帖照數給發仍令於五日內補文備案再令敬事房每月一次將陸續領用過各項物件查明某日某人因成造何項什物領用過某處何項物件若干逐款分晰開寫清單鈐蓋敬事房圖記於次月十五日以內呈報本府轉交各該處查對

凡固倫公主乘用轎車係用金黃蓋紅幃紅緣蓋角金黃垂幃

### 發報事宜

康熙二十一年二月本府具奏駕幸盛京如有不可羈遲事件請差官馳驛前往奏聞等因奉旨著繕寫奏摺交臺站人等賚送奏聞欽此 四月奉太皇太后懿旨皇帝回鑾將近其應送鮮果等物著陸續送往欽此欽遵謹將應送果品封固派內務府各司領催等帶領東路莊園及投充人等臺站賚送交驛站筆帖式等呈奏嗣後凡遇巡幸圍獵將發報之處豫行奏聞 二十三年五月本府具奏賚送鮮果之果上人令其馳驛並隨帶馬夫賚捧等因具奏奉旨所需馬夫不可過六名欽此 九月本府奏准凡賚送瓜蔬鮮物派有品級栢唐阿及頭目賚送 二十四年七月奉旨賚送鮮果著於庫使內擇其家道殷實者馳驛賚送欽此 三十四年九月奉旨現今天氣寒冷馬匹疲瘦鮮果朕亦不甚用如梨蘋果堅實之物著裝匣封固交賚送本報之人帶來其餘果品停止賚送欽此 四十三年八月奉旨外邊果品俱已足用嗣後著間一報賚送一次欽此 五十七年六月奉旨養心殿武英殿監造等亦著賚送果品欽此 是月奉旨嗣後如年逾四十五歲者不可令其賚送果品欽此 七月本府具奏派員來取出哨應需上用冠袍皮衣等因具奏奉旨往取朕之衣服途間不可用驛站車輛著用潔淨車輛裝載務令潔淨處安放

由京來時派內管領一員副內管領一員同取衣之太監等一同送來以此爲例欽此凡遇巡幸宮殿監督領侍等傳發內報如與本報同發者本府移會內閣將發報日期豫先知會同發儻有更換日期亦於前一日知會其應發內報由敬事房封固交本府轉交兵部臺站筆帖式賚送到時交奏事人等 乾隆十四年七月經辦理軍機處遵旨查奏以驛站筆帖式馳送本報遲延到於果報之後一事除將遲誤該員交部查議外查馳送果報人員內從前於康熙年間因齎送鮮果之庫使海成胡什巴俱係舊家子孫曾經降旨於應陞之處列名並未有因馳報速疾賞賚者請嗣後馳送果報人員除路近者無庸議外如果有路途遙遠馳報速疾者應作何鼓勵之處交總管內務府大臣另議具奏 八月本府議覆奏准凡遇巡幸出外其驛站之筆帖式馳送本報俱係按站人馬全行更換惟鮮果乃御用之物關係緊要故特於庫使內揀選人妥貼者由京城送至駐蹕行宮因負駝重不換人是以自來一個時辰應馳報若干里數及馳報速疾著應作何賞賚之處俱未經定擬今蒙恩旨著將馳送果報之速疾者飭交酌議鼓勵查此次馳送果報之庫使蘇成額於七月十六日卯時自京起程至十七日申刻到熱河京城至熱河四百餘里

合計一日馳報二百六十餘里較之從前人員馳送果報似覺稍速嗣後凡遇巡幸出外令馳送果報人員一日馳驛二百五十里自京三百里以內路途近便毋庸議外其三百里以外一日能馳報二百五十里至二百八十里者作爲二等賞給官用緞一匹一日於二百八十里外又能多馳者作爲一等准其於應陞之處列名再如有違誤若不加懲責亦無以示警戒除一日馳報過二百里者作爲平等毋庸議外如一日不能馳報二百里止能一百八十里者記過一次一日馳報在一百八十里以內者更屬遲延即鞭責四十嗣後將馳送果報人等自京起程時刻本府登記檔冊其到去時刻由行在內務府註記寄信發回將馳報人員之遲速查明統俟回鑾進宮之後再行奏聞辦理但馳報一項全仗好馬相應飭交兵部傳諭驛站官員務須豫期豫備好馬視其一到卽行給與乘騎其庫使蘇成額馳報已至二等相應賞給官用緞一匹以示鼓勵 十月本府奏請查巡幸哨鹿圍獵齋送時鮮果品之庫使蘇成額馳報至二等業經賞給在案再續送果品之庫使內除路近及不在應賞等第亦未爲遲誤者毋庸議外其一日馳報二百五十餘里之庫使保福德貴已至二等每人應各賞官用緞一匹一日馳報二百八十里以外之庫使

周裕仁巴克散已至一等應照奏准之例於應陞司庫副內管領驍騎校及有品級頭目等缺列名之處酌量分別註冊儻入冊之後如有當差懶惰不能奮勉行走者即將應陞名目除銷仍照例料理等因具奏奉旨依議一等者亦著賞官用緞一匹欽此 嘉慶十三年八月總管太監常永貴口傳奉旨嗣後巡幸熱河過八月十五日即停止賚發果報如重陽日傳用花糕時即交熱河總管穆騰額辦理開銷錢糧欽此

### 外任旗員丁憂報部

道光十一年九月吏部奏准嗣後八旗外任實缺人員父母在旗病故如適遇截缺之期應令該家屬於遭喪之日呈明該參佐領即行出具圖片報部開缺如有遲延照例議處至外任候補候選人員父母在旗病故無關開缺仍照五日呈報例限辦理 二十三年七月吏部奏准八旗外任人員父母在旗病故該家屬於遭喪之日即呈報該參佐領該參佐領於本員丁憂五日限內先出具圖片報部如該員病故之日適遇截缺之期應令該家屬於遭喪之日呈明該參佐領該參佐領即行出具圖片報部開缺

遲延者  
免議

### 年班事宜

道光十二年正月奉上諭向來盛京五部侍郎及各省將軍都統副部統城守尉總管等有年班輪替進京之例嗣後著自到任之日起扣滿三年奏請陛見俱毋庸年班進京至直隸總督古北口提督每遇轡輅巡幸時得以扈從召見其年班進京之例亦著停止欽此 二月准盛京將軍咨奉上諭昨降旨將各省將軍都統副都統等員奏請年班進京之例停止均於到任之日起扣滿三年奏請陛見惟盛京城守尉察哈爾總管例不奏事著於到任三年後由該將軍都統代爲奏請陛見將此各諭令知之欽此 十九年正月奉上諭向來回子伯克每年朝覲九班論流四川土司三年朝覲兩班輪流在該伯克土司等輸忱展覲不敢告勞惟念萬里馳驅載塗雨雪朕俯懷况瘁爲期未免過勤著加恩自道光十九年起回子伯克年班改爲間二年朝覲仍照舊九班輪流第一班著自道光二十一年來京第二班著於二十四年來京此後照此辦理四川土司年班改間五年朝覲一次仍照舊班輪流第一班著於道光二十四年來京第二班著於三十年來京此後均照此辦理用示朕懷柔遠服體恤優加至意欽此 三月奉上諭向來越南國二年一貢四年遣使來朝一次合兩貢並進琉球國間歲一貢暹羅國三年一貢在各該國抒誠



效順不敢告勞惟念遠道馳驅載塗雨雪而爲期較促貢獻頻仍殊不足以昭體恤嗣後越南琉球暹羅均著改爲四年遣使朝貢一次用示朕綏懷藩服之至意該部卽遵諭行欽此 二十年二月奉上諭前後藏堪布入都進貢每年於新正呈遞丹書克豫於上年臘月抵都此次據理藩院奏稱前後藏堪布多桑孜邁等於正月十五日到京已令於三月初一日呈遞丹書克矣因念該處距京萬里之遙自因山川阻隔雨雪載途以致行程不能豫定若仍令其每年輪班入貢恐屆時急於趲程跋涉間關更增勞勩殊非優禮喇嘛之意所有前藏堪布業已來京其後藏著於道光二十二年入貢輪至二十五年前藏再行入貢此後每間二年入貢一次以次推遞用示恩施格外體恤優加至意該衙門卽遵行欽此 十一月奉上諭吳文鎔奏琉球國遣使來閩籲請照舊間年進貢一摺向來琉球國間歲一貢上年降旨改爲四年遣使朝貢一次原所以體恤外藩茲據該撫奏該國王遣使來閩請照舊間年進貢情詞極爲眞摯著如所請行所有該陪臣子弟四名准其隨同貢使北上入監讀書餘著照所議辦理欽此

道光十三年七月奉旨刑部覆奏辦理逆案緣坐犯屬嗣後反逆案內律應擬凌遲之犯其子孫訊明實係不知謀逆情事者無論已未成丁均著照乾隆五十四年閹割之例交內務府閹割發往新疆等處給官兵爲奴其年在十歲以下者令該省牢固監禁俟年屆十一歲時解交內務府照例辦理並著內務府大臣遇解到閹割人犯即遴派司員認真看驗並出具無弊切結送交刑部刑部堂官於該犯送交後卽派司員再行覆驗如有情弊卽回堂奏參總須查驗明確再交兵部發往新疆給官兵爲奴此次臺灣逆匪張丙等家屬卽著遵照辦理並著內務府刑部存記遇修例時纂入則例欽此

### 吸食鴉片烟處分

嘉慶二十四年閏四月總管內務府大臣常福面奉諭旨著總管內務府大臣等嚴查所屬內務府郎中員外郎主事筆帖式等如有食鴉片烟者卽行參奏革職如該堂官不行參奏別經發覺定將該堂官懲處不貸欽此 道光十九年五月宗人府等衙門內務府會議奏准嚴禁吸食鴉片烟處分章程

一吸食鴉片烟人犯在京各衙門以奉旨之日爲始予限一年六個月限滿不知悛改無

論官員軍民人等一概擬絞監候其在一年六個月限內犯者仍分別辦理

一職官買食鴉片烟原例加平民一等治罪今擬職官買食鴉片烟在一年六個月內者仍加平民一等治罪均從重發往新疆地方充當苦差

一職官因吸食鴉片犯案在一年六個月以內發往新疆者永不敘用概不准各該城大臣等因事保奏

一在京各衙門及外省督撫有將吸食鴉片之員列入京察卓異別經發覺即將原保舉官議處吏部查吸食鴉片之員保舉京察卓異者原保官照濫舉匪人例降二級調用私罪自行查出揭參免議惟屬員吸食與否斷難先期逆料如保舉前實未吸食保舉後始經吸食原保官應請免其議處至有將緊要差使派委吸食鴉片之員因而誤公者統視所誤公務之大小將原派官分別嚴議不得僅以失察論

### 賞罰功過

道光十三年九月吏部遵旨酌議奏准嗣後如有遺失印鑰鑰牌之案即將遺失之員從嚴議以降一級留任不准抵銷遇有應行陞轉之缺概行停其陞轉三年無過方准開復

其僅止遲誤請領印鑰並無遺失情事者仍照原例罰俸一年 十九年七月吏部奏准

在京各衙門印信封存在署當月值宿官員專司監守有印官例不在署住宿如被人竊

去專司監守之員革職有印官革職留任俱公 五日內拏獲究辦開復原參處分未經行

用專司監守之員減為降一級調用有印官減為降一級留任俱公 已經行用專司監守

之員減為降二級調用有印官減為降二級留任俱公 一月內尋獲未經行用專司監守

之員減為降三級調用有印官減為降三級留任俱公 已經行用專司監守之員減為降

四級調用有印官減為降四級留任俱公 至在署封存偶遇水火猝不及防以致燬失者

專司監守之員革職留任有印官降三級留任俱公 五日內尋獲開復原參處分係革職

留任者減為降一級留任係降三級留任者減為罰俸二年俱公 一月內尋獲係革職留

任者減為降二級留任係降三級留任者減為降一級留任俱公 二十一年四月兵部

奏准在京武職各官印信如係本員自行收掌被賊竊去者革職係在署封存有該班值

宿官員專司監守有印官例不在署住宿者將專司監守之員革職有印官革職留任俱公

罪其五日內自行拏獲者准開復原參處分如未經行用減為降一級調用已行用者降

二級調用一月以內拏獲遺失之印未經行用減爲降三級調用已行用者降四級調用

係有印官自行收掌者將有印官降調其非有印官自行收掌者即將專司監守之員降

調有印官俱減照所降之級留任俱公罪如非自行拏獲者仍不准減議至印信在署封存

猝遇水火燬失如有實跡可據者專司監守之員革職留任有印官降三級留任五日內

自行尋獲准開復原參處分係革職留任者減爲降一級留任降三級留任者減爲罰俸

二年一月內自行尋獲係革職留任者減爲降二級留任降三級留任者減爲降一級留

任俱公罪如非自行尋獲者亦不准減議再兵部例內載有佐領圖記被賊偷竊實有偷竊

情形可據者將該佐領降二級調用私罪若將圖記質當或潛攜在外遺失裝點被賊情形

捏報偷竊者革職提問私罪等語查佐領之有圖記與武職各官之有印信名色雖殊其用

則一設若遺失被竊自應一律辦理應請嗣後凡佐領圖記被竊即照遺失印信覈議其

有將印信質當及遺失而捏報被竊者應即照佐領捏報圖記被竊之例辦理

### 滿洲臣僕俱應通曉清文

道光十五年六月奉硃諭朕因滿洲侍郎以下至五品京堂人數衆多其能否通曉清文

未能概知是以特命分日進內考試其繙譯通順及能繙而錯誤者不過十之三四竟不能落筆者過半焉此則甚屬非是清語乃滿洲根本並非分外之事無論何項出身俱應熟習况辦理部旗諸務皆有清文事件若不通曉將何異於漢官豈止爲人所笑不有忝於乃祖乃父耶嗣後我宗室覺羅暨八旗臣僕勤修本業勉紹家聲斷不可不曉清語不識清字以副朕務本成全諄諄誥誡之至意將此通諭知之慎勉毋忽特諭欽此

欽差大臣不准隨帶現任大員子弟

道光十五年十一月奉上諭嗣後欽差大臣查辦事件其隨帶司員不准以現任大員子弟派往欽此

機桶事宜

道光十六年十月本府具奏乾清宮等處額設機桶七十架圓明園長春園額設機桶七十五架查乾清宮等處現在整齊者十六架再修理四架計二十架圓明園長春園等處現在整齊者七架再修理十八架計二十五架交該總管等分設各處妥爲看管其餘糟朽不齊者分年陸續修補每次不過二十架足敷試演之用至隨機桶器具由營造司添

補妥協交進每架應用太監等演習交該總管照依交出奏明原單辦理至圓明園應派總管首領太監及每架應派太監園戶等名數交該總管等照宮內章程奏明遵辦每年春秋二季眼同演習一次其鐵錨宮內現有二個再添造二個並斧鋤器具擬備二分紫禁城內交內務府火班存收圓明園交堂檔房存收所有此項機桶器具自本年安設後每年會同該總管等查驗儻有應行修理之處歸入秋季歲修交出分別修理等因一摺奉旨依議欽此

宮內器具

長桿鐵杈子五把

長桿鈎子十把

長桿蕪刷十把

蜈蚣梯子二個上鈎下截

機桶二十架每架隨小水桶六副各隨扁擔鈎繩

圓明園器具

長桿鐵杈子六把

長桿鈎子十二把

長桿蕪刷十二把

蜈蚣梯子四個上鈎下截

機桶二十五架 每架隨小水桶六副 各隨扁擔鈎繩

### 責令筆帖式繕寫清文

道光十七年二月奉上諭給事中清長奏請責令筆帖式繕寫清文一摺各部院所設筆帖式職司繕寫清文原不應假手於供事書吏若如該御史所奏近來各部院衙門難保無供事書吏代寫清文之事恭查嘉慶二十四年有永遠禁止諭旨自應欽遵辦理嗣後凡有清文事件應責成筆帖式繕寫以符體制並著各衙門查明此後如有代寫等弊該堂官據實參奏將失察之該管官員並雇倩供事書吏繕寫清文之筆帖式一併交部分別議處欽此 二十五年五月奉旨御史張寶璜奏筆帖式不諳繙譯請嚴定章程一摺著各該堂官妥議具奏欽此 六月本府議覆奏准本府筆帖式等凡遇接收京外各衙門來文無論清漢均係繙寫清文辦理尙無錯誤嗣後該筆帖式等如有繙譯優長差使勤慎者列名在前遇有陞階儘先陞用其不認真學習及差使懶惰之人即行甄劾務期繙譯俱各諳習差使亦無貽誤

### 接收各國貢物章程



道光十八年二月本府奏准嗣後琉球暹羅越南緬甸南掌廓爾喀等國進到貢物俟該部院具奏後定期交本府在堂上眼同接收毋庸分交各司處領去即交廣儲司按款收存並委六庫郎中廣儲司官員詳細查明呈覽後再行分交各司處承領至所進貢物內如有火藥等項卽先交武備院在外庫接收以昭慎重

### 滋生銀兩

雍正七年二月奉旨看得大臣侍衛等俱不能生理俸餉以外並無進益且出入無節時至窘迫著將內庫銀兩給與乾清門侍衛一萬兩三旗侍衛每旗各二萬兩內管領等員二萬兩司院官員二萬兩令伊等或置房招租或貿易取利任其滋息分用亦得優裕欽

此其派員生息之處詳見都虞司

乾隆五年二月本府奏准海保入官萬成當舖一座架本銀三萬三

千八百七十四兩零仍留開設所有一應公用等項移於萬成當舖所得利銀內動支如不敷用仍由豐和當利銀內撥給外其餘剩利銀仍分賞內務府文武官員後因每年官員等所分利銀無幾於乾隆十二年三月本府奏准年終停其分給將所剩利銀如遇司官內管領等隨圍照護軍參領驍騎參領等應得幫銀之例逾一月者給幫銀二十兩逾二

月者給幫銀四十兩散秩六品以下官員逾一月者給幫銀十兩逾二月者給幫銀二十兩俱由當舖滋生銀兩內動支放給 十九年六月本府奏准查吉慶等十當共架本銀

三十八萬八千八百五十一兩零俱收回將現存銀兩及銷變貨物架本銀兩陸續解交

長蘆鹽政普福借給商人營運每年所得利銀交納內庫 詳見廣儲司 再吉慶等十當從前借

給各官銀兩內除陸續交過本利外將其餘尙未交還銀三萬六千二百三十八兩零照

宗人府例作爲五年將本利催齊歸入萬成豐和二當一體生息俟利銀充裕之時另行

請旨辦理 並詳都虞司 三十年二月本府奏准豐和萬成二當本利十萬三千兩收回交與

長蘆鹽政按一分生息每年可得利銀一萬二千三百六十兩遇閏加銀一千三十兩作

爲放給隨圍官員人等幫銀以及熱河盤山黃新莊湯泉打牲烏拉等處總管盛京佐領

年例養廉各等處月例紙筆飯食並雜項出差人等幫貼盤費續因差務繁多所得滋生

利銀不敷放給將各等處月例年例以及總管等養廉出青隨圍官員人等應得幫銀俱

減半放給

濫賞銀兩

從前盛京等三處官濩解到時俱係侍衛內務府司員筆帖式六庫庫使等交價認買招商售賣所得餘利銀兩卽分賞侍衛本府司員以及筆帖式庫使等近因濩價昂貴於乾隆三十二年十月本府奏准將三處交到官濩分交兩淮等九處變價於乾隆三十三年九月據兩淮等九處交到價濩除定價外其所得餘利銀兩如何分賞之處請旨一摺奉旨知道了所有三旗侍衛內府官員內務府筆帖式六庫庫使等四處每處著賞銀一萬兩欽此 三十六年十一月軍機大臣福隆安等奏准每年賞給本府司官筆帖式六庫庫使等濩賞銀三萬兩內撥給軍機處銀五千兩步軍統領衙門銀三千兩濩嘉慶八年六月本府奏請前經軍機處奏准將本府每年濩賞項下撥給軍機處銀五千兩撥給步軍統領衙門銀三千兩遵辦在案但近因本府人數衆多差務殷繁以致不敷分賞費用可否於原撥給軍機處銀五千兩內扣留銀一千兩撥給步軍統領衙門銀三千兩內扣留銀二千兩以爲添補辦公之用等因一摺奉旨上諭前因內務府大臣奏請於濩銀項下原撥軍機處賞項內歸還銀一千兩原撥步軍統領衙門賞項內歸還銀二千兩添補辦公當卽諭令軍機大臣步軍統領衙門詳查奏聞茲據查明將歷年分賞銀兩數目據實

覆奏軍機處章京等差使繁重費用甚多前已於應領項下暫減銀九百兩步軍統領衙門司員等每年當差辦公之用亦惟資此項分給由來已久朕一視同仁未便遽照內務府大臣所請如數撥還但念該衙門司員人數較多公項不敷分給著於原撥軍機處賞項下扣出銀五百兩步軍統領衙門賞項下扣出銀一千兩交內務府收領嗣後該大臣等亦不得聽屬員不知足之言再行瀆請欽此

### 恩賞銀兩

雍正三年七月奉旨內府文職官員並無進益著向崇文門監督每年取銀一萬兩給與內府官員以爲飯銀其如何分給之處著內務府總管等酌量定擬分給欽此 十三年

十二月奉旨內府武職官員亦照文職官員例每年賞給銀一萬兩每年具奏請旨欽此

照文職之例擬定分數  
賞給之處詳見都虞司 乾隆二年十二月奉旨文職既賞有雙俸停其賞給欽此 嘉

慶二十四年閏四月總管內務府大臣禧恩面奉諭旨嗣後每年朕詣覺生寺拈香初次仍照例具奏賞該廟僧衆銀二十兩二次即毋庸賞給自此次始著爲令欽此 道光十

四年五月本府奏准嗣後每遇皇上詣廣仁宮拈香奏請賞給該寺僧衆銀八兩此項銀

兩由廣儲司給發

### 按摩人役事宜

康熙三十二年十月奉旨剃頭學習按摩太監十名幼童八名及教習人二名交與內務府大臣稽察學習太監等日間令其在外學習晚間進內值宿仍令內膳房給伊等飯食欽此 四十七年正月奉旨著內務府訪察外間剃頭人有善於按摩者併所屬佐領管領下人丁內儻有畧會剃頭取耳按摩者一併詳細查明具奏欽此 閏三月遵旨揀選

得內府佐領管領下尙可學習剃頭按摩之幼童十名令其學習奏准照柏唐阿例每月給與二兩錢糧米石除太監等另有公費外擬定幼童等十二名每日每人各給老米七合五勺向掌關防內管領處領取內外按摩房每年二月初一日至十月三十日每日煮飯溫水共用炭十六斤煤二十四斤十一月初一日至次年正月三十日每日共用炭二十斤煤五十斤圓明園住班做飯每日用木柴三十斤向營造司領取凡隨侍所用車輛向掌關防內管領處領取所用馬匹盤費交都虞司會計司辦理所用剃刀雜項等物向各該處領取俱由內務府堂上傳交

一按摩人役缺出於各佐領管領下幼童內揀選挑補

道光十八年七月本府具奏請將按摩處現設頭目二名照舊留作教習其學業人十名內裁去六名酌留四名肄業以備接挑教習應添學習剃頭太監即於會計司招募太監內擇其年歲可以學習者挑選數名令其在外常川學習如果手藝嫻熟再爲聲明交進若學習無成仍入招募數內交進其每月月銀由本府加賞太監錢糧項下每名給銀二兩應得口分等項與現留人役六名一體照例向各該處領取至掌儀司衙門向有太監承應差務處所此項學習太監即令歸併一處棲止並責成該處首領照管俾一切有所稽查等因一摺奉旨會計司招募太監內擇其可以學習剃頭者著在會計司棲止餘依議欽此

### 查銷冊稿

道光二十四年四月奉上諭給事中奕蓂奏各衙門廢稿存貯滋弊請飭變通一摺著在京文武各衙門查明議奏欽此 是年五月本府議覆奏准嗣後每屆二年將本府庫內收存冊檔稿件派員清查一次即將無用之件運出銷燬至圓明園造辦處御茶膳房御

藥房寧壽宮精捷營等處及本府所屬之三旗護軍營此後亦每屆二年由各該處自行查覈呈明本管大臣將無用之件送交內務府彙總銷燬

並查二十四年四月奉旨諭旨中奏請將各衙門廢錄各件及未領到之件並各衙門

內務府所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門

各省各衙門所屬各衙門及各省各衙門所屬各衙門及各省各衙門所屬各衙門